

**AUIVI O LE TUSI AOGA ASO SA 2022  
VASEGA MATUTUA FAAPITOA**

**AOAO TETELE: “E I AILE ATUA I SO O SE MEA”**

**IANUARI – MATI: “AUA LE AUNOA TATOU MA LE ATUA”**

**IANUARI:**

30 - Aua le mapu le faafetai i le Atua  
Salamo 30: 1 – 12

**FEPUARI:**

6 - Faalagolago i le taitaiga a le Agaga  
Roma 8: 9 – 17  
13 - Tatou te le o, e aunoa ma le Atua  
Esoto 33: 12 – 23  
20 - E palefeagai le loto faamaoni ma le onosai  
Luka 8: 4 – 15  
27 - E sauaina le amiotonu, ae manuia  
Isaia 3: 1 – 15

**MATI**

6 - O le taulaga manogi lelei i le Alii  
Luka 1: 4 – 17  
13 - O luko sauā  
Galuega 20: 17 - 32  
20 - O aafiaga o le o’a  
Mareko 10: 17 – 31  
27 - O le augani ina ia salamō  
Ieremia 22: 1 – 12

**APERILA – ME: FAAUTAUTA LELEI, E LE TO’A FILEMU TAIMI UMA”**

**APERILA**

3 - Ia ola mata’u i le Atua  
Mataio 10: 26 – 33  
10 - **(LAUPAMA)**  
Vivii i le loto mautinoa  
Ieremia 20: 7 – 13  
17 - **(ASO SA TOETU)**  
O le faamoemoe ola  
1 Peteru 1: 1 – 12  
24 - Inu malie i le Alofa o le Atua  
Salamo 107: 1 – 9

**ME**

1 - Ua mao sasalu Hamanu  
Eseta 6: 1 – 11  
8 - **(ASO SA O TINĀ)**  
Avea ma tinā e susulu atu  
Filipi 2: 12 – 18  
15 - Malologa o le Fono Tele  
22 - O le faatuatua toafilemu  
1 Tupu 18: 1 - 16  
29 - Fai le mea sili ma tatau  
Esoto 23: 1 – 11

**IUNI: O MEAAI E OLA AI LE AGAGA**

**IUNI:**

5 - Taiala o le ola i le Agaga  
Teuteronomie 4: 1–14  
12 - O le vai ola  
Ioane 4: 10 – 15  
19 - Ua valaau le poto  
Faataoto 1: 20 – 33  
26 - Afioga a le Atua e popoto ai  
2 Timoteo 3: 10–17

**IULAI: SILAFIA E LE ATUA MEA UMA**

**IULAI**

- 3 - Aua le tofotofo i le Atua Galuega 5: 1 – 10  
10 - E le sola se tagata mai le Atua  
Salamo 139: 7 – 12  
17 - O le amiotonu a le Atua Mataio 17: 24 – 27  
24 - Salamō e faaolaina ai Iona 4: 5 – 11  
31 - O le ola i tala atu o le oti Mareko 12: 18 - 27

**AOKUSO: VAAI MAMAO I LE LUMANAI MA OLA TAPENAPENA I AI**

**AOKUSO**

- 7 - Ua faaolaina ona o le vaai mamao  
Kenese 41: 52 – 57  
14 - **(ASO SA O TAMĀ)**  
Ua faasoa e le tamā manuia i le atalii  
2 Samuelu 19: 31 – 40  
21 - Ia Ave le ola mo le Alii Mareko 8: 34 – 38  
28 - Ua loto malie ua vaai i le faaolataga  
Luka 2: 25 - 35

**SETEMA: A AU LE ATUA MA I TATOU O AI SE FAASAGATAU MAI**

**SETEMA**

- 4 - O le tusi i le Ekalesia i Efeso Fa'aaliga 2: 1 – 7  
11 - Ua fasiotia ulumatua o Aikupito  
Esoto 12: 29 - 36

- 18 - O le lotomaulalo o Keriso Filipi 2: 1 – 11  
25 - O le faailoga tagata Iakopo 2: 1 – 7

**OKETOPA: I TOTONU O FAIGATA MA LUITAI O LO O I AI LE ATUA**

**OKETOPA**

- 23 - O le alofa faatinā Mareko 7: 24 – 30  
30 - O le tusi i le Ekalesia i Semurana  
Fa'aaliga 2: 8 – 11

**NOVEMA: TALITONU I LE ATUA**

**NOVEMA**

- 6 - O Tepora le Famasino Faamasino 4: 4 – 10  
13 - Valoaga o le pau o Papelonia  
Ieremia 51: 1 – 10  
20 - Faamanuiaga Faaleagaga Efeso 1: 1 – 10  
27 - O le sese o Kalatia ma le a'oaiga a Paulo  
Kalatia 1: 3 - 17

**TESEMA: O LE FAAVAE O LE OLIOLI**

**TESEMA**

- 4 - O le malamalama o le Atua Kenese 1: 1 – 5  
11 - Ua logo mai le tala i le tupu Isaia 9: 2 – 7

\*\*\*\*\*

## **MANATU TAIALA IANUARI – MATI:**

### **AUA LE AUNOA TATOU MA LE ATUA**

O lo tatou talitonuga ma le faatuatuaga; O le Atua e toatasi na ia foafoa mea uma, i lana pule ma lona mafai. O le ala foi lea, e matuā tatau ai ona tatou faalagolago tumau ia Ia, ‘aua tatou te oese ma Ia, i taimi uma o la tatou folauga o fai nei.

**ASO SA:** **30 IANUARI 2022**  
**(ASO O TUPULAGA)**

**MATAUPU:** **‘AUA LE MAPU LE FAAFETAI I LE ATUA**

**SINI:** Ia a’oa’o tamaiti ia latou iloa, o le lagona fia faafetai pea e le aunoa, e pogai mai lou talitonu, i le faamaoni o le Alofa tausī mai o le Atua.

**TUSI FAITAU** Salamo 30: 1 – 12

### **FESOASOANI MO FAIAOGA:**

E muamua ona faatalofa atu ma faafeiloai atu iā lua susuga i faiaoga, ma la tatou vasega. Tatou faafetaia le agalelei o le Atua, ua tatou aulia manuā mai ai lenei aso fou, i lenei tausaga fou.

O la tatou mataupu o lenei Aso Sa, o le manatu maualuga, ia amata lenei tausaga faa-le-Aoga Aso Sa, i le faafetai i le Atua. O le faafetai e le gata o so tatou nafa tausī, ae ia avea foi, o se lagona faamaoni e puna mai pea i o tatou loto, i taimi uma; ina ua tatou iloa ma talitonuina, o le Alofa lava o le Atua, ua tatou aulia mai ai le aso.

O le agaga maualuga lea; Ia le faia le faafetai ona o se tu po o se aga ua masani ai; ia le faia foi ona o se faatonuga e fai; ae fai

ona o le mautinoa e le tagata i lona loto, e leai se isi malosī e ese mai le Atua, Le na lavea’iina ma faaolaina mai tatou, i aso uma o lo tatou ola. O le lagona maualuga lea ma le mautinoa o Tavita, i le Alofa o le Atua mo ia.

O tatou foi sa puapuagatia, sa inosia ma itagia foi e tagata, ona o ō tatou faaletonu. E oo lava i lo tatou va tapuia ma lo tatou Atua, tatou te sesē foi ma le atoatoa. Ae ona o lo tatou Atua, e le toilalo lona Alofa i le leaga e fai e le tagata, ae saili mai pea i lona finagalo Alofa faamaoni, seia oo ina iloa tino ma mautinoa e le tagata, ona toe foi lea i le Atua ma le loto ua salamo ma tautino lona agaga faafetai i le alofa o le Atua. O le iloa mautinoa lea o Tavita, o faailoa i lenei pese. I le fuaiupu e 11 & 12 o le Salamo, o lo o ta-aofai ai e Tavita lona lagona loloto, i le faamaoni o le Alofa laveai o le Atua iā ia. Fai mai ua aveese e le Atua lona tagitu’i, ona o puapuaga sa la fetai’i, ae ua siva fiafia nei i le Alofa o le Atua. Sa faanoanoa foi ma popole, ao lea ua olioli. A’o na mea silisili ma le matalasi ua fai e le Atua ia Tavita, lea ua mafua ai ona pese “lona mamalu,” i le Atua e faavavau. O le mamalu o faasino i le loto.

Fanau, ia tatou iloa le moni o le Alofa o le Atua ia tatou i aso uma o lo tatou ola; e lagona ai pea e le aunoa le faafetai ia te Ia. O Iesu, o le Alofa tunoa o le Atua mo tatou uma, e ala i le Taulaga faaola sa ia saunia.

### **Uiga o Upu ma Fuaitau:**

- |      |                    |   |                       |
|------|--------------------|---|-----------------------|
| i)   | liua (f.11)        | - | suia                  |
| ii)  | lo’u mamalu (f.12) | - | lo’u loto             |
| iii) | le mapu (f.12)     | - | le malolo/fa’auau pea |

### **GALUEGA FAATINO:**

Sailiiliga faalauaitele i lou iloa o le Tusi Paia

E tele faafitauli sa fetaii ma Tavita, o lo o atagia i lenei pese; Ae o le faafetai, ona o le Alofa lavea’i o le Atua. Tusi mai ni

faafitauli se lua o e iloa i le Tusi Paia, sa lavea'iina ai Tavita e le Atua: Muamua – o le ita o ona fili iā ia. Lua – o le sesē lava o Tavita ia.

Tali:

Muamua: 1 Samuelu 24: 1(ff) }  
1 Samuelu 26: 1(ff) } o fili o Tavita

Lua: 2 Samuelu 6:1 (ff) – Atolaau }  
2 Samuelu 12: 1 (ff) – Agasala ia Patisepa } sese o  
1 Nofoaiga Tupu 21: 1(ff) } } Tavita  
2 Samuelu 24: 1(ff) } } fia ta'utau'a } lava ia

- E mafai ona saili e lau susuga i le Faiaoga tusi o avatu e fai ma tali, ona fesoasoani lea i tamaiti e ala i lou faamatalaina i ai, ona e pu'upu'u le taimi.

**PESE:** 26 (Na fai tagata ua lelei)

**A'OA'OGA:**

1. O le Atua lo tatou lavea'i.
2. Ia moni le lagona faafetai i le Atua.
3. E silisili lava le Alofa o le Atua.

.....

**ASO SA:** 6 FEPUARI 2022

**MATAUPU:** FAALAGOLAGO I LE TAITAIGA A LE AGAGA

**SINI:** Ia a'oa'o tamaiti ia latou iloa, o le taitaiga a le Agaga Paia, o i ai le mautinoa ma le saogalemu moni.

**TUSI FAITAU:** Roma 8: 9 – 17

**FESOASOANI MO FAIAOGA:**

Tasi lenei tusi i le Tusi Paia, e faigata ona tau faamatala auiliili, lona mataupu silisili o taoto ai. A'o lei faamatalaina la faalaua'itele la tatou mataupu; Ia tatou mafaufau muamua i le manatu lea; - E le mafai e lo tatou malosi faa-le-tino, ona lavea'iina o tatou loto ma agaga; Ae mafai e o tatou loto, ona taitaiina ese o tatou tino, mai le leaga o tuinanau i ai.

O le vaega tonu o le tusi i le Ekalesia i Roma sa tatou faitauina, o lo o vavala mai ai le manatu o ta'ua i luga; auā o le ute atoa o taoto i totonu o le Mataupu lenei e (8), o le tusi a Roma, "O le tauamiotonuina o le tagata i lona faatuatua, o lona manuia lenā."

O le tauamiotonuina ma le faatautua, o lo o faasino i le faa-le-agaga, lea e tautala i ai Paulo; A nofo le Agaga o le Atua i le tagata, o le tagata tauamiotonuina lena, auā ua i totonu o ia le Keriso. A i le tagata foi Keriso i le loto faamaoni, o le faailoga lena ua oti lona tino agasala, ae ua ola lona tino faa-le-agaga. O le Agaga o Keriso, o le Agaga lava lea o le na toe faatuina mai, ma ua soifua o Ia ma ola faatasi ma ē o faatuatua ia te ia.

O le faamamafa la lea a la tatou mataupu o lenei taeao, e pei ona faamanatu mai e le Aposetolo, o lo tatou faalagolago moni i le taitaiina a le Agaga mana o le Atua, o lo tatou mautinoa foi lea, o lo tatou saogalemu mai le agasala ma le tele o sesē, tatou te ono malaia ai. Fai mai Paulo i le f.14 – "Auā o i latou uma na taitaiina e le Agaga o le Atua, o atalii i latou o le Alii." O lona uiga faigofie – Afai e tā'ua i tatou o atalii ma afafine o le Atua, ona o tatou ua nofo mau le Agaga o le Atua i totonu o o tatou loto, ma na taitaiina tatou; Ona tatou le toe fefefe lea ma pologa i le agasala, ae o le a avea i tatou ma tama fai, po o ē ua vaetamaina e le Atua. Ona tatou valaau atu lea; i le tulaga o lo tatou avea ma atalii fai o le Atua, "Le Tama e!"

Tamaiti, faalologo pea ma mulimuli i le taitaiga a le Agaga o le Atua, e taunuu manuia ai lo outou taumafai, ma outou fealofani ai. O Iesu, e lei taunapa i lona tulaga mamalu o le Alo o le

Atua, ae sa faalogo lava ma usiusitai i lona Tamā; lea na Ia maliu ma toe soifua mai manumalo; ua tatou manumalo ai faatasi ma Ia, e ala i le faatuatua i le Agaga o le Atua.

### **GALUEGA FAATINO:**

Faamatala mai le uiga o fuaitau o lo o tuuina atu mai le Tusi Paia, e iloa ai ua e malamalama i le uiga o le mataupu.

(i) f (11) - “... i totonu ia te outou le Agaga o le na toe faatu mai ia Iesu nai e ua oti....”

Tali: f (11) O lo o faasino i le Agaga o le Atua, a i totonu o tagata, e toe faatutuina mai i latou e le Atua, mai o latou tino agasala.

(ii) f(12) - “... ua ia te i tatou e tau ai atu ....”

Tali: (f 12) O lona uiga o tatou o tagata aitalafu afai ua tauamiotonuina i le Alofa o le Atua e ala ia Keriso, ia totogi atu i le amio Atua faa-le-Agaga, a’e le o amio faa-le-tino.

(iii) f (17) - Afai foi o fanau i tatou, o sulii foi, o sulii lava o le Atua, o sulii faatasi ma Keriso.

Tali: (f.17) E tau fanau loa tatou e le Atua, o lona uiga ua ia te i tatou lona Agaga, ma ua taua foi tatou o sulii o le Atua, e pei foi o Keriso.

**PESE:** 199 “Iesu taitai oe; Ia imatou nei.”

### **A’OA’OGA:**

1. Avea le Agaga o le Atua ma ou taitai-ala
2. Faatuatua ia Iesu e avea ai oe ma tamafai.
3. O le Atua o i ai lo tatou mautinoa ma le saogalemu.

.....

**ASO SA:** 13 FEPUARI 2022

**MATAUPU:** TATOU TE LE Ō, E AUNOA MA LE ATUA

**SINI:** Ia a’oa’o tamaiti ia latou iloa, a le auai le Atua i so o se faamoemoe, e le mafai ona taunuu manuia.

**TUSI FAITAU:** Esoto 33: 12 – 23

### **FESOASOANI MO FAIAOGA:**

O le soifuaga lenei tatou te i ai, ua faatusaina i se malaga. O le malaga e fa’auau pea e le uma, aua e mavae atu lea tupulaga ma lea tupulaga, a’e agai mai foi isi augatupulaga latou te fa’auauina le ola o fai nei. O le taua tele lenei o le i ai o se taiala mautu ma tumau, e lima taitaiina ai le savaliga o le ola o fai nei; E fai foi le taiala lenei ma faavae e tausii, e mautinoa ai le taunuuga manuia o le malaga. Ioe! O le Atua e toatasi le taiala sili ma tumau mo le ola.

O la tatou mataupu o le taeao nei, O le malaga a Isaraelu i Kanana lo latou laueleele na folafola i ai e le Atua, e o e nonofo mau ai, ma atia’e ai lo latou nuu, i lalo o le taitaiina a Mose. Ae o le vaega tonu o le Tusi sa faitau, o lo o felafolafoa’i ai Mose ma le Atua. O lo o fia mautinoa e Mose pe latou te malaga ma le Atua; auā e le tatau la ona o, ona latou te leiloa, latou te le mafaia foi se mea aemaise o lea ua iloa, e toatele tagata eseese o nofoia le laueleele. Fai atu Mose i le Atua e pei ona taua i le f 15 – “Pe afai ta te le afio atu ma oe, ‘aua le aveina a’e i matou i le mea nei.” I le ma lea, sa fai atu foi i le Atua; “E iloa ua e alofa mai ia a’u, ma lou nu’u nei, pe afai e te afio atu faatasi ma matou.” Sa tautino lava e le Atua ia Mose lona alofa ia ia ma le nuu, ma o le a Ia faia lava le mea o fai atu ai. Sa tuuina atu foi e le Atua lona mamalu ia Mose; e ala i lona faailoa ia Mose o mea uma o Ia finagalo ai, e le gata e iloa ai e Mose ma le nuu le alofa

moni o le Atua ia i latou, ae ia latou talitonu foi i le Atua. O le iuga foi o tagata taitoatasi, o le a pau lava i ona luga, pe afai e le alofagia o ia e le Atua.

Tupulaga ma tatou uma; O le taua tele lena ma le lelei, o le talitonu faamaoni i le auai mai o le Atua, e ala i lona Agaga mafuta mai ia tatou. O lo tatou maunoina lena, ma o le taunuuga manuia foi lena o la tatou savaliga o fai nei, ma so o se faamoemoe tatou te manatu ai. O le maea o le faafetai e pei ona sa tatou i ai i le la vaiaso ua tuanai, ona valaau lea i le Atua, tatou te malaga ma ia i lenei tausaga, ona o tatou o tagata vaivai. O le taulaga osia foi na faia e Iesu Keriso, o le tatou au faatasi lava lea ma le Atua, e ala i le faatuatua.

### Uiga o Upu ma Fuaitau:

- i) f 18 mamalu - paia/faasilisiliina
- ii) f 19 mutimutivale - naunautai/tele
- iii) f 22 mavaevae - avanoa/vetevetei

### GALUEGA FAATINO:

Taliga Fesili (mafaufau loloto i le tala, a o e faitau i le Tusi Paia ma tali fesili nei)

1. O le a sou iloa, o ai lea e uiga i ai le tala a Mose; “po ai e te auina mai ma te toalua,” o i le f 12?

Tali: O le Atua

2. Tau mai, pe faamatala mai le faamaoniga o lau tali o i le fesili muamua.

Tali: E iloa i le faaiuga o le f 12 – “Ua ou iloa oe i lou lava igoa, ua alofagia foi oe e a’u.” O lo o silafia e le Atua le uiga o le manao o Mose. Pe la te o ma ia, pe leai? O le uiga la o le tali a le Atua, ia iloa ai e Mose, la te faatasi lava ma ia ina ua tautino atu “E alofa iā ia, la te faatasi pea lava foi ma ia.”

### A’OA’OGA:

1. Malaga faatasi ma le Atua.
2. O le Atua le taiala sili.
3. ‘Aua e te alu na o oe.

.....

**ASO SA: 20 FEPUARI 2022**

**MATAUPU: O LE FAAMAONI E O FAATASI MA LE ONOSAI**

**SINI:** Ia a’oa’o tamaiti ia latou iloa, o le faatinoga o le loto faamaoni i le Alii, o i ai faatasi ma le onosai.

**TUSI FAITAU:** Luka 8: 4 – 15

### FESOASOANI MO FAIAOGA:

O le faataoto i le lulu saito sa tatou faitauina tatou te tau soo ane ai, aua o lo o faamauina foi i le Mataio 13: 1 – 23; ma le Mareko 4: 1 – 26. O lo o manino lelei lava le faamatalaga o le faataoto, e uiga i le lulu saito ma ituaiga eleele eseese e fa, o toulou i ai fatu saito. Ona alaga atu lea o Iesu e pei ona faamau i le f 8; “O le ua i ai taliga e faalogo ai, ina faalogo mai ia o ia.” O i ua faateia ai le au so’o, na mafua ai ona fesili; Ae le o malamalama le au so’o, o latou tonu o faatatau i ai le upu lea a Iesu, ae le o i ai se mea o tupu. Auā e tataua ona faalogo lelei le au so’o i le fetalaiga a Iesu, ma latou taofi lona uiga loloto, auā o latou e tuu i ai le galuega mulimuli ane. O le tali atu la a Iesu i ai i le f.10. O lo o manino lelei ai; e tataua i le au so’o ona faalogo ma lagona, ma manino i o latou loto le uiga o mea lilo o le malō o le Atua. Le afaina ia tagata, afai e lē o malamalama, ona e ese lo latou mafaufauga o i ai, faapea o le malo o afio mai ma Iesu, o

se malō faa-militeli. A o le nafa tausī lea o le au so’o, o le faamanino i tagata le uiga o le malo o le Atua. Lea la ua toe faamanino lelei atu, mulimuli le uiga loloto o le faataoto, e pei ona famamafa mai le f.15.

O le uiga loloto lea ma le faataua o le faataoto, “O le faalogo lelei i upu o fetalai mai ai le Alii, ma talia i le loto talitonu faamaoni; Ona fiu lea o faigata o fesouaina solo ai, ae tupu pea le onosai ma tutumau ai lava i le Upu a le Alii. O le faamamafa foi lea o la tatou mataupu o le Aso. Ua tatou iloa, o le tagata na te talia ma le faamaoni le finagalo o le Alii, e fetaiāi ma le tele o faigata, e faaosoosoina ai. Ae o lona tutumua, o le ata manino lena o lona onosai. O se luitau taua tele mo tatou le fanau. A aunoa ma le faamaoni ma le onosai i le tauiviga faa le a’oa’oga o i ai nei, e le i’u lelei foi le taumafai. O le ala lea sa savalia foi e Iesu i lana galuega, o le onosai ma le faamaoni i le finagalo o lona Tamā. Lea na tualuga i le Taulaga faaola o lona toetu manumalo, mo le manuia o le lalolagi faatuatua.

#### **GALUEGA FAATINO:**

Matematega: Mate mai, po’o ai le tagata, po’o tagata, e faasino i ai upu, ma faamatalaga o i lalo:

1. saito  
Tali: O Iesu (Upu a Iesu)
2. Tagata lulu saito  
Tali: O le Atua
3. Mea papa  
Tali: Tagata e leai ni a’a.
4. “Ina ia latou le vaai i lo latou vaai, ina ia le lagona foi, i lo latou faalogo.”  
Tali: Tagata e ese lo latou manatu i le malo o sau ma Iesu le tupu.

5. I lea mea lilo o le malo o le Atua.  
Tali: So’o o Iesu.

**PESE:** 183 “Tautuana le Alii le Faaola”

#### **A’OA’OGA:**

1. E onosai le loto faamaoni i le Atua.
2. Ia avea o tatou loto ma eleele lelei.
3. Faalogo lelei taliga.

.....

**ASO SA: 27 FEPUARI 2022**

**MATAUPU: “E SAUĀINA LĒ AMIOTONU, AE MANUIA”**

**SINI:** Ia a’oa’o tamaiti ia latou iloa, o ē sauāina ona o le tutumau i le Alii, e faamanuiaina lava i latou.

**TUSI FAITAU:** Isaia 3: 1 – 15

#### **FESOASOANI MO FAIAOGA:**

O le mataupu sa faitauina, o le ata o le faamasinoga ma le malaia e ono oo ia Ierusalemā ma Iuta, pe afai e le gauai, ma le ususitai i le Atua. “E ono siomia Ierusalemā e le fili, ma faatamaia uma ona taitai.” I le f.2 – 3, o le lisi umi o tagata e ono aafia i le puapuaga; o le faailoilo lena o le loloto o le mea e goto i ai le nuu, a o le faailoga foi lena o le matuia o le agasala. Ae maise lava, o le pau maulalo o le tulaga i le taitaiina o le nuu e ono taitai, talu le malosi o le agasala. O le matautia ona o le toe fetaiāi lava o tagata o le nuu ia. O le a pule e tamaiti le malo. O le a sosopo tamaiti i tagata matutua, o le a leai foi se

feavatai ma se fa'aaloalo. O le a le masino le mau faafitauli, ae foliga e leai se fofo e maua o ia puapuaga. Aua a liliu ese le finagalo alofa o le Atua mai ia latou, o le mautinoa lena o le leai o so latou lavea'iina e maua. Ua faataaloga i vai e le nuu le agasala, ua lē toe natia se mea e pei ona faia e Sotoma. A o le leaga tele ma le faigata, ona e tau solomua mai taitai, le fiafia ma le taumafai e opogi tu-faapaupau ma ua fai ma aganuu a tagata.

Peitai, e ui lava i le mamafa o aao papai ifo o le Atua ua folafolaina, ae o i ai lava le iuleo o le lavea'iina, mo i latou o e faia le amiotonu; f 10 "Fai atu ia i le ua amiotonu, e manuia o ia. Aua o le fua o latou galuega, latou te aai ai." O le a oo mai le aso o le Alii, o le aso lea o le faamasinoga; e faamasinoina uma ai lava tagata, o e lelei ma e leaga. Ae maise lava taitai, sa latou taitai tagata i ala sesē o le agasala. O alii sili ma toelaiina o le nuu, o i latou ua ola mai le afu ma le tautiga o nai tagata vaivai ma le matitiva. O uiga le alolofa ia, ua alia'e tele, ona ua le malie le mana'o, ma fa'aaoga ai le tulaga, ae lailoa ai tagata mauualalalo. E sa'o ai le Faataoto 17: 1, "E lelei si fasi mea ai magumagu, a'o i ai le filemu; ae leaga le fale ua tumu i manu ua fasi, a'o i ai le misa." Auā o le manao tele, e le gata ina aafia ai tagata matitiva, ae leai ai foi se alofa i tagata vaivai. A o i latou nei, o onosai lava i mea ua au i ai le mafai, faatalitali ma faalagolago i le fesoasoani mai o le Atua, i so o se ala o finagalo ai.

Tupulaga, fiafia e fai le mea sa'o, tusa pe upuia ai oe. O ala na e faamanuia mai ai le Atua. O Iesu foi, sa lailoa lava o lana amiotonu, lea na tau i le satauro ma le tuugamau. Ae na toe soifua mai manumalo, mo le manuia o tagata uma, e ala i le faatuatua.

### Uiga o Upu ma Fuaitau:

- i) f.(1) lagolago areto - sapalai (supply) o mea ai
- lagolago vai - sapalai (supply) o vai

- ii) f.(5) faasiaasia - gutu oso/taliupu/tulai ma tetee atu
- iii) f.(8) tausuai - tau tevateva/le sagatonu le savali.

### GALUEGA FAATINO:

Taliga Fesili – Tali mai i lou iloa faamataupu silisili, e tusa o lau faitau i le Tusi Paia, ma lou malamalamaaga i le tala ua faamatala atu e le faiaoga.

1. O le f 4 – 5; O e manatua se tala i le Tusi Paia, ma le taimi na tupu ai se mea faapea, e pei ona taua i fuaiupu ia?  
Tali: Taimi ua mavae Solomona, ae tulai mai lona atalii o Reopoamo e fai ma tupu; Sa au faatasi ma tupulaga, ae faatuatuanai tagata matutua, lea lava sa vevesi ai, ma vaeluaina ai le malo.
2. A tupu le mea lea e taua mai le f (1) o le a sou iloa; e matuia atu ai lava le Covid-19 o tupu nei? Faamatala lau tali.  
Tali: E matuia atu le mea o taua i le f (1), auā e le atoa se vaiaso e leai ai se meaai, ma leai se vai i le lalolagi, ae leai se isi e totoe, ua oti uma tagata.
3. O lea e agasala uma lava tagata o le nuu. Ae aisea e pau ai le mamafa i taitai?  
Tali: Ona o taitai e sau ai le faatonuga e usitaia e tagata. Afai la o leaga le atunuu ma agasala pea tagata, o le pine lena e iloa ai, o lo o solomua i taitai le fiafia i le agasala, o le ala foi lena o le leai o se faatonuga, e tuu.

PESE: 219 "E manuia lava"



## A’OA’OGA:

1. Fiafia e fai le amiotonu
2. Pipii i le Atua e manuia ai.
3. Alofa i le uso vaivai.

.....

**ASO SA: 6 MATI 2021**

**MATAUPU: O LE TAULAGA MANOGI LELEI I LE ATUA**

**SINI:** Ia a’oa’o tamaiti ia latou iloa, o le loto talitonu faamaoni i le Alii, o le taulaga manogi lena mo Ia.

**TUSI FAITAU:** Luka 1: 5 – 17

## FESOASOANI MO FAIAOGA:

O le Taulaga, o se upu e lautele lona uiga; ona e le tasi se ituaiga taulaga. O taulaga osi i manu vaefa; manu felelei, fua o faatoaga ma isi e tele. O taulaga tupe foi e pei ona tatou faia nei i le Ekalesia. So o se mea lava e te faia, po o le a le ituaiga galuega; o le taulaga osi le mea lena. Ae o fia tuliloa i le sini, le avea o le loto faamaoni i le Alii ma taulaga manogi; ona so o se taulaga lava e fai e le tagata; na te ofo atu mea sili ma lelei e fai ai, ona ua malie atoatoa i ai lona loto. So o se galuega foi e tofia i ai, e mafua ona e punou faamaoni e faatino, ona e talitonu lou loto, o lo o silasila mai le Atua na te tauia oe, o lo o fai ma le loto malie lau galuega.

I le f (9) o la tatou tusi faitau, le filifilia o Sakaria, e avea ma Ositaulaga Sili e ala i le vili. O le filifilia o laua ma Elisapeta lona toalua i lea faiva, o lo o taua manino mai lava, e pogai mai lo la amiotonu i le Alii, e lei tauleagaina lava i laua, ae sa

savavali ma le tonu i poloaiga ma tulafono a le Alii. O le ositaulaga sili, o ia lea e taga i le vaega e aupito sili ona paia o le malumalu. E filifilia Sakaria i le tofiga lea, e le’i i ai sa la tama ma Elisapeta, ae ua matutua i laua. Peitai, e ui o se tulaga faigata lea i le natura o le sosaiete faatagata soifua o la ola ai; ae lei avea lea ma ala e faaluafesasi ai lona loto faamaoni i le Alii, Le e ou le feau ma tofiga. Sa tumau lava Sakaria i le tatalo i le Atua, ina ia fesoasoani ia ia, ina ia tumau pea lona loto faamaoni i lona valaauina. Sa le aunoa foi i lana tatalo lona augani pea i le Atua, mo so o se tau e finagalo ai mo ia. Lea ua tatou iloa i le tala sa faitauina, sa faafofoga lava le Atua i tatalo a Sakaria ma foa’iina la la tama o Ioane le papatiso.

E ui lava i le atuatuvaale o Sakaria, ina ua fa’aali atu le agelu a le Alii ia te ia, ma tautino le tama o le a fanau mai e Elisapeta; ae le mafai ona taofia ai le mea ua finagalo ai le Alii. Sa lagona e Sakaria le olioli i le Alofa o le Atua, e toatele foi sa fiafia i le fanau mai o Ioane. Sa tautino mai foi i lea lava taimi, le faiva o lē o le a fanau mai, o ia o le teuteu ala mo le Alii. Tamaiti, o le faamamafa lea o la tatou mataupu o lenei Aso Sa. O le a lava le tiute po o le galuega ua tofia i ai oe, ia fai ma le faamaoni ma le loto talitonu i le Alii, o le taulaga sili lena ona manogi lelei i ona luma. Pei foi o Iesu, e le’i alo i faigata ma tiga o lana galuega, ona o lona finagalo alofa moni ma le ususitai i lona Tama. Sa ia osia ai le taulaga silisili mo tatou ina ia tatou ola e ala i le faatuatua.

**GALUEGA FAATINO:** Faafetauiaina (Matching)

Vaai lau Tusi Paia, ma tusi mai le tagata poo tagata e faatatau i ai fuaitau o tusia atu i lalo.

1. Vasega o Avia
2. Sa Arona
3. tupu o Iutaia
4. pau ia te ia le vili
5. e le inu uaina

6. f.17 “E muamua atu foi o ia  
 (i) i ona luma  
 (ii) o ai e faatatau i ai upu o vase lalo

- Tali: 1) Sakaria 2) Elisapeta 3) Herota  
 4) Sakaria 5) Ioane 6) (i) Ioane (ii) Iesu

**PESE:** 154 (“Lou lava Alii e, o oe lo’u Matai)

**A’OA’OGA:**

1. Ia loto faamaoni i le Atua.
2. Fai le mea sili mo le Alii.
3. Toaga e tatalo

.....

**ASO SA:** 13 MATI 2022

**MATAUPU:** O LUKO SAUA

**SINI:** Ia a’oa’o tamaiti ia latou faaeteete, i le matautia o ē e le talitonu i le Alii o Iesu.

**TUSI FAITAU:** Galuega 20: 17 – 32

**FESOASOANI MO FAIAOGA:**

O la tatou mataupu o lenei taeao, “O luko saua.”. O le luko, o le manu vae fa e foliga i se taifau, ae feai; e le maua i Samoa nei. O luko sau la, po o luko feai, e le o faasino i manu e pei ona ou ta’ua, ae o faatatau i tagata matautia, o lo o taumafai e faasese, ma faaliliuese tagata mai lo latou talitonuga ia Iesu Toetu. O le a la faamamafa lena i la tatou mataupu o lenei Aso Sa; o le faautauta lelei, faaeteete, ma ia matuā mataalia foi. O ia itu

uma, e tausisia ona e talitonu ma faatuatua faamaoni le loto i le Alii.

O le lalolagi o tatou i ai i nei aso; ua tele vave ma agai pea i luma le atamai, faatasi ai ma le tele o suiga eseese o le olaga. E le gata o suiga tetele i le soifuaga faa-le-tino nei; ae ua masausau ai foi ma suiga i le ola faa-le-faatuatua, e ono liliuina ma taitaieseina ai lo tatou talitonuga i lo tatou Alii. O latou la o taumafai e taitaiese le au faatuatua mai lo latou faatuatuga i le Alii o Iesu Keriso, o latou na o taua e Paulo iinei, “O luko sau.” O le tusi sa tatou faitauina, o le tusi apoapoai ma le faamalosi a Paulo i toaina o le Ekalesia i Efeso, atoa foi ma so o se Kerisiano e faitau i lenei Tusi. O lo o tautino lava e Paulo lona onosai i faigata o le galuega a le Alii, talu lona naunau ia manuia tagata. Ona o lea ua sauni e alu ese, ailoga a latou toe fevaaia’i, o le ala lea o lana tusi atu ma le loto naunau. Tautuana, e amata lava ia te outou o fai ma leoleo o le Ekalesia (lafu mamoe) a le Atua. O lo outou faatuatua, e o faatasi ma lo outou mataala ma le faautauta. Leaga o lea o le a alu ese le Aposetolo, ae mautinoa lava, e i ai lava i latou e le faatuatua, i latou o taumafai e faasese tagata ma faa-leaga le Talalelei ia Iesu. Tagata pepelo ma amio piopio, pei o le sau o luko feai lo latou matautia, latou te fia manumaloina loto o e oi le Ekalesia. O le mea lea e taua ai le mataala, ma mafaufau i apoapoaiga sa le utuva ona tuuina atu mo outou.

Fanau, o aso nei o le tele o suiga ma taaviliga eseese o le olaga, o i ai faatasi ma le malosia o taumafai e toso atu outou, i fiafiaga ma le matagofie o le lalolagi, a o lo outou mamao ese lava lena mai le Atua. O le mea lea, ia mataala ma faaeteete, ma ia tutumau i le Alii lo outou maluapapa. O Iesu lava lena, e lei toilalo i se faaosoosoga o le lalolagi, ina ia na maua tagata uma i lona Alofa, e ala i le Taulaga faaola sa ia osia.

**GALUEGA FAATINO:** (Matematega: Fa’aaoga lau Tusi Paia)

1. O le fuaitau o i le f 18, “Ua outou iloa la’u amio .....!  
 O ai e faasino i ai le upu “outou” ma le upu “lau amio”?

Tali: “Outou” – toeiina o le Ekalesia i Efeso “la’u amio” – Paulo.

2. O ai luko sau o taua i le tala?

Tali: Tagata piopio e le talitonu ia Iesu, ae o tauamfai e faasese tagata.

3. O a mea aupito sili ona fia aai ai luko?

Tali: O tagata faatuatua i le Alii o Iesu.

4. O fea e omai ai luko sau e tusa o lau faitau i le tusi?

Tali: E omai lava i totonu o le Ekalesia ma aiga o e o leoleo i le Ekalesia.

5. O le fuaiupu e fia o le tusi sa faitau, e te iloa ai, e le popole Paulo pe oti ai le galuega?

Tali: f 24 “O lo’u lava ola foi, ou te le naunau i ai.”

**PESE:** 157 “Ave lou ola ia aoga...”

### **A’OA’OGA:**

1. Faatuatua i le Alii o Iesu.

2. Faautauta i suiga o le olaga.

3. Vaai oe i ai ese luko.

.....

**ASO SA:** 20 MATI 2022

**MATAUPU:** O AAFIAGA O LE OA

**SINI:** Ia a’oa’o tamaiti ia latou iloa ona faaeteete, i le matuia o aafiaga o le oa.

**TUSI FAITAU:** Mareko 10: 17 – 31

### **FESOASOANI MO FAIAOGA:**

E le fou lenei tala ia tatou, auā o lo o tusia foi e Mataio ma Luka. E le tasi foi se a’oa’oga taua o maua mai le tala sa tatou faitau nei, ae o lo o tatou tuliloa le faamamafa e pei foi ona i ai i le vaiaso ua tuanai; O le faautauta ma le mataala. O le vaiaso ua tea, o le faaeteete ma le faautauta, i le matautia o tagata o siomia ai oe; A o le aso, o le faaeteete i mea totino, po o le tamaoiga, e aoga ma tele lona taua i le atinaeina o le olaga lautele i le itu i le tino. Ae o le fautuaga e faautauta, ina nei avea ma mea e faatuatua i ai le tagata ona galo ai lea o le Atua. O le autu ma le puna, o so o se ituaiga oa ma malosi eseese uma o le lalolagi.

O le tala sa tatou faitau nei, o lo o alia’e ai le faafitauli lea. Auā na fesili le tagata ia Iesu, i le ala na te maua ai le ola e faavavau. Ona ta’u atu lea e Iesu le tele o mea e fai, ae tautino ane e le tagata o lo o ia faia ia mea uma. Ae o lo o silafia lava e Iesu, e tele ana o’a, a’e na te le o mafai ona fai se galuega alofa i nai tagata matitiva. O le ala lena o le fetalai i ai o Iesu, e alu e faatau ana mea a’e tufa i tagata. Peitai, sa matuā ootia lona loto, ma lagona le tiga; ona alu ese ai lea.

O le taulealea, ua le usiusitai ia Iesu le puna o le oa i le lagi ma le lalolagi, talu lona manumanu i mea oi ona lima. Ua galo i le uso, o mea o ia te ia, e ou le Alii ia mea uma. Na pau le itu o saili atu e Iesu, pe talitonu ma faatuatua mai ia te Ia; A’o lea e leai; ona ua manatu, e lavea’iina o ia e le oa o ia te ia, ma lona le iloa, e na te le maua le ola –faavavau, ma le malo o le lagi i mea o le tino, ae maua ia Iesu, e ala i le faia o lona finagalo. Le uiga loloto lena o le fetalai atu o Iesu i le f.27, “E le mafaia e tagata, na o le Atua; aua e mafaia mea uma e le Atua.” Tau lava o le faatuatua i le Alii ma lona mafai, ona lagona lea o le usitai ma talitonu, e tauia mai e le Alii taifaitau selau ana mea uma.

Fanau, e leaga le ‘aiū, po o le lima-mau! E le afaina lou lima vaivai, ae afai e tele sou manuia, alofa ane i nai tagata vaivai o i ou tafatafa. O Iesu, e lei fefe e ofo lona ola e ala i le Taulaga sa ia osia, ona o lona Alofa ia ola tagata vaivai ma pologa i le

agasala. Faaeteete, ina nei e toe faaletonu, i le tele o mea o ia te oe!

### **GALUEGA FAATINO:**

Taliga Fesili

1. O le a le mafuaaga o le tiga o le tagata lea na tamoe ane ia Iesu?

Tali: Sa ia lagona le loto mafatia, ona e tele ana o'a, a'o lea ua fai iai Iesu; E alu e faatau atu ma tufa mo tagata matitiva.

2. O tulafono e 10, o ta'ua i le Esoto 20; o faatatau isi i le va feagai ma le Atua; a o isi i le va feagai ma le isi tagata. O le fea vaega, o faasino i ai tulafono o taua i le f.19?

Tali: Faasino ile va fagai ma le isi tagata.

3. O le f.25, o le tala faatusa a le Alii! A o le a sou iloa, e sa'o pe sese?

Tali: E sa'o.

4. O ai o faatatau i ai le fetalaiga a Iesu, o fai i ona so'o, e pei ona taua i le f.23?

Tali: O faatatau i le taulealea o taua i le f.17

**PESE:** 109 (Afio mai oe, le Agaga Sa e.)

### **A'OA'OGA:**

1. Alofa i tagata matitiva

2. 'Aua le aiū

3. 'Aua nei maileia oe e le o'a.

.....

**ASO SA:** 27 MATI 2022

**MATAUPU:** O LE AUGANI INA IA SALAMO

**SINI:** Ia a'oa'o tamaiti ia latou iloa le taua o le salamō.

**TUSI FAITAU:** Ieremia 22: 1 – 12

### **FESOASOANI MO FAIAOGA:**

O le augani, o le faatalaauula lava lea; o le faaoololoma'au po o le aioi foi, ina ia salamo. O le soifuaga o tatou i ai nei, e matua taua tele le amanaia o le tofiga ua tofia i ai oe, po o le tulaga foi ua valaauina ai a'u, e auauna ai. A o le faataua lea, e iloa mai le faia o le tofiga i le faamaoni ma ia faavae i le alofa i tagata o i lalo o lau taitaiga; auā o le finagalo moni lena o le Atua e ou le tofiga! O le uiga loloto lena, po o le faamamafa o ataata mai le f.10 – 12. “Aua tou te fetagisi ona o le tagata oti, pe faanoanoa foi!” O taiga masani lava na o le ola. “A e fetagisi ona o le tagata e aveesea i le pule sau a isi tagata, ma le toe vaaia lava i le olaga lenei!” Auā o le mea ia mautinoa, a tupu le mea lea, e le tupu fua lena mea, e aunoa ma le pule a le Atua.

O le agaga lea o taoto i totonu o le vaega o le tusi sa tatou faitau nei. O le malaia, po o le puapuaga o faamalumalu ifo i tupu o le malo o Iuta ma ona tagata e aafia ai pe afai e le salamo mai le leaga ma toe foi i le Atua. O le augani la po o le aioi a le Perofeta o lona uiga, o lea e maua le avanoa e toe lavea'iina ai, ma faasaoina; ae faalagolago i le salamō ma toe foi e fai le finagalo o le Atua. Auā afai e lē salamō ma le liliu i le Atua, ona avea faa-tagata o taua lava lea o latou i le pule a isi tagata. E le gata la o le faatafea i nuu ese, ae oti ai lava foi, e le toe foi mai i o latou eleele moni, e le toe vaaia foi i latou, e tagata o o latou aiga ma o latou nuu, e oo i le faavavau. E sili atu lena ona matuia, nai lo le oti lava i le aiga, i se gasegase pe ona ua tagata matua foi, auā o taiga masani lava na o le olaga o tatou i ai nei.

O sauaga uma lava ma faigata o tolaulau i le f 5 – 9, e oo i ai tupu o Iuta ma ona tagata, pe a le liliu i le Atua. Tupulaga, e taua la tatou galuega fautua i isi uso ma tuafafine.

E taua foi le lagonaina e le loto le salamō ma liliu pe afai ua i ai ni faaletonu ma ni sese. Auā o le salamō, o le faailoga ua toe foi i le Atua, o le taumamao ese foi lena, mai le oti i le pule a nisi tagata.

### **GALUEGA FAATINO:**

Fai sina faatinoga puupuu o le tala. O le poloaiga mai le Atua mo tupu o Iuta, e ala atu i le perofeta o Ieremia.

**PESE:** 368 “Fai mea tonu, o mea lelei”

### **A’OA’OGA:**

1. E taua le salamō.
2. E faanoanoa le oti i lima o isi tagata.
3. O tu’u avanoa mai le Atua.

.....

### **MANATU TAIALA O APERILA – ME:**

#### **FAAUTAUTA LELEI, E LE TO’A FILEMU TAIMI UMA”**

O se lapataiga, po o se fautuaga atamai lea ma tatau mo tatou uma, a’o gasolo le malaga o le olaga o fai nei. Auā e faaosoosoina pea tatou, ae maise taimi o le sololelei, ona mamā lea o le manatu, ma galo ai le faautauta ma le faaeteete o finagalo ai le Atua mo tatou.

**ASO SA: 3 APERILA 2022**

**MATAUPU: IA OLA MATA’U I LE ATUA**

**SINI:** Ia a’oa’o tamaiti ia malamalama, e le faatauvaavaa i le finagalo o le Atua, le tagata e ola mata’u ia te ia.

**TUSI FAITAU:** Mataio 10: 26 – 33

### **FESOASOANI MO FAIAOGA:**

“O le matau i le Alii, o le amataga lea o le poto; ae inoino tagata valelea i le poto ma le a’oa’oina” (Faataoto 1: 7) O le tusi o Faataoto o i ai le fuaitau o i luga, e tele ina tautala i le poto; ae o le tagata poto, o le tagata na te iloa pe talitonu i le Atua. O lona uiga la, e amata pe mafua ona e iloa le Atua, ona e te mata’u ia te Ia. O le faamamafa lena o la tatou mataupu o le Aso Sa lenei; “O le Mata’u” O le mata’u i lona faamatalaina lautele, e tusa o la tatou Mataupu; e aofia ai le ava , usitai, ma le fa’aaloalo; o uiga uma na o le tagata talitonu.

O le mea ia mautinoa,; e le avea lou mata’u i le Atua, ma ala e te manatu ai, e te saogalemu pea e te le a’afia i ni puapuaga. Leai, o puapuaga lava ia o le ola lenei, o aofia i totonu o le natura o mea e tutupu. E i ai le taimi e tutupu ai tiga ma puapuaga; e i ai foi taimi e toafilemu ma solo lelei ai; E le taugalemu ma sololelei taimi uma o le ola, o faiga lava na ua tatou masani ai. O le tagata foi e moni lona talitonu ma le faatuatua i le Atua; na te mautinoa lelei lava, e le faapea a fetaia’i ma faigata, ona faapea lea ua le manatu mai le Atua. Ua tatou iloa foi, o faigata o le ola lenei, e tofotofoina ai lo tatou faatuatua i le Atua. O le manatu lena o tuliloa i la tatou tusi faitau; ‘aua nei matata’u ma fefefe i tagata latou te le talitonu ia Iesu. E leai se mea e tasi o latou faia faalilolilo, e le fa’aalia i luma e le mana o Iesu, auā e le pogisa se mea e tasi i le Alii. Afai o le tagata le palealii o galuega a le Atua, e faafefea ona lilo pe galo i le Atua le tagata;

ae o nai manu ninii e pauu i le eleele e le galo i le Alii. O le silafia o le Atua e oo i laulu o le ulu o le tagata na te faitaulia uma. O le mea lea, ia outou talitonu ma matata'u i le Alii lo outou Atua.

Fanau, ola matata'u, e le gata tou te popoto ai ma atamamai, ae le mafai ona lilo ai outou i le silasila alofa a le Atua. Le maliu foi o Iesu ma lona Toetu mamalu; e le gata o lona soifua usiusitai ma le ava i lona Tamā, a o le alofa ia manuia le lalolagi, o e faatuatua ma matata'u ia te Ia.

### Uiga o Upu ma Fuaitau:

- |      |                |   |                          |
|------|----------------|---|--------------------------|
| i)   | f (26) matatau | - | atuatuvale/ava           |
| ii)  | f (28) Kena    | - | seoli/ole tō e le uma    |
| iii) | f (29) Asari   | - | pene e tasi/tasi le sene |

### GALUEGA FAATINO:

Taaloga e fa'aaoga ai le mafaufau mataala (Fa'aaoga le Tusi Paia)

Tusi mai i lalo le upu ma lona faafeagai, o ta'ua mai i le (i) f 26, (ii) f 27, (iii) f 28, (iv) f 31.

- |       |                                |   |            |
|-------|--------------------------------|---|------------|
| Tali: | (i) (f 26) ufiufitia or ufitia | - | fa'aalia   |
|       | (ii) (f 27) pouliuli           | - | malamalama |
|       | (iii) (f 28) Agaga             | - | tino       |
|       | (iv) (f 31) iti                | - | tele       |

**PESE:** 2 (Ina vivii i tatou nei)

### A'OA'OGA:

1. Mata'u i le Atua e potu ai
2. E tatau le ava i le Alii
3. O faigata e tofotofoina ai le ola faatuatua.

**ASO SA:** 10 APERILA 2022  
(ASO SA O LE LAUPAMA)

**MATAUPU:** VIVII I LE LOTO MAUTINOA

**SINI:** Ia a'oa'o tamatii ia latou iloa, o le vivii a'e i le Atua i le loto mautinoa, e pogai mai le faamaoni o le faatuatua.

**TUSI FAITAU:** Ieremia 20: 7 – 13

### FESOASOANI MO FAIAOGA:

O le Aso Sa lenei o le Laupama, e faamanatu ai i tausaga uma le malaga faatupu a Iesu i Ierusalem, lea sa tualuga i le Taulaga o le Faaolataga, sa ia maliu ma toe soifua mai ai manumalo. Sa alalaga ma taumanuo tagata e faaeaea i le afio atu o Iesu, peitai, sa toe fesiligai lava e nisi po o ai lea? O nisi foi o i latou, sa toe alalaga mulimuli lava e faasatauro Iesu. O le ala lea o tagata e alalaga ma vivii i taiga, ae latou te le o mautinoa le Alii.

Ae o le tala sa tatou faitau, o le agaleagaina o Ieremia, sa lagona ai lona mafatia tele; ona e foliga sa ia ta'uta'u atu ma le faatuatua le finagalo o le Atua, ae leai se tali mai i lana vaai, ae na o faigata e tupu ai lona faanoanoa. Ona foliga lea i lana tagi, o lo o faasea; peitai, e sualua ona lagona. Na ona faaleo mai i lona gutu, e faasea, ae o lo o ia lagona; O taimi e mafaufau ai, o le a le toe tautala i se upu e uiga i le suafa o le Atua, a o le taimi tonu lea; e pei o se afi mumu lona loto. O le faailoga moni lea, e ui o tiga, a o lona loto e le o solomuli mai le talitonu ma le mautinoa o le Atua. Lea lava la e fa'aalia le faatuatua lea o le Perofeta i le Atua, i le faaiuga o lona faagau le malie i le f 11 – 13 sa tatou faitauina. O lo o atagia ai lona talitonu i le mafai o le Atua o lo o ia faatuatua i ai; o lo o ia faatusa ai i le toa matautia o lona Atua, e atuavale ma faaletonu ai i latou o e o ita ia ia; e le gata e le manuia tagata na, ae le galo foi lo latou maasiasi e oo i le faavavau. Sa tautino lava foi e le Perofeta, o

ona puapuaga sa sa'i ai, o tofotofoga lava mo ia, po o tumau lana amiotonu atu ia Ia. O lona manao foi e fia vaai tino i le iuga o i latou nei, sei fai foi ma faamaoni ia i latou, e le sese le mea sa finau atu ai le Perofeta e uiga i lona Atua. Ona alaga ai lea o ia, ia vivii ma faamanu ae i le Atua; aua o Ia, o lo o ia alofa faamaoni, e lavea'i ma faaola tagata matitiva ma vaivai, mai lima o e amio leaga.

Fanau, tutumau faamaoni i le Atua i le loto talitonu ma faatuatua, o ia e lavea'i mai i lo tatou vaivai. O lo tatou mautinoa foi lena, tatou te lavatia ai onosai, puapuaga tatou te fetai ai o le ola o tatou i ai, ma lagona le agaga vivii ma faamanu ai i lona suafa ma le mautinoa. O le faaolataga foi na saunia e Iesu, e mo tatou ma le lalolagi faatuatua uma, ia ola ma vivii a'e ai i lona Alofa Tunoa uma.

### Uiga o Upu ma Fuaitau:

- i) f (7) tapisa - pisapisaō/vavaō  
tauemu - ulagia/manatu faatauva/ula
- ii) f (8) faatafunaga - fa'inaelo/faalumaina  
faalumaina - faama  
tauemua - ulagia/inosia
- iii) f (11) tausuai - felotoai/faaletonu

### GALUEGA FAATINO:

Taliga Fesili: (O fesili mai le Mataupu, poto salalau, Tusi Paia)

1. Aisea ua tautala ai faapea Ieremia i le Atua, fai mai ua faaoleole le Atua ia te ia, o i ai i le f. 7? (i) e sao? (ii) faamatala mai le uiga o lau tali i le (i)

Tali: (i) E le sao, e sesē  
(ii) Ona o lona tigā, ua masua atu ai i lona gutu ia upu, a o lo o toe tautino lava e le Perofeta mulimuli ane, lona faatuatua faamaoni ma lona tumau i le Atua.

2. O ai tagata ia e lamalamā le Perofeta?

Tali: O ana lava uō e pei ona taua i le f. 10.

3. O le a le matautia e oo i ai puapuaga ma le maasiasi o tagata nei latou te ita i le Perofeta ma lana feau?

Tali: E le galo e oo i le faavavau lo latou maasiasi.

4. O le f (12), o ai o faatatau i ai faaupuga muamua lava "Le alii o au e, o lē e tofotofo i ē ua amiotonu.

Tali: O faatatau lava e le Perofeta ia te ia!

**PESE:** 83 Vivii atu ia i lo tatou Alii

### A'OA'OGA:

1. E tatau le viiga i le Alii le Atua.
2. E lavea'i le Atua i lē o i ai lona mautinoa ia Ia.
3. E puapuagatia le tagata amiotonu.

**ASO SA: 17 APERILA 2022  
(ASO SA O LE TOETU)**

**MATAUPU: O LE FAAMOEMOE OLA**

**SINI:** Ia a'oa'o tamaiti ia latou iloa, o le "Toetu o Iesu" o le faamoemoe autu lenā o le ola o fai nei.

**TUSI FAITAU:** 1 Peteru 1: 1 – 12

### FESOASOANI MO FAIAOGA:

O le Aso Sa lenei o faamanatu ai le Toetu manumalo mai o Iesu, mai le oti ma le tuugamau. O le Toetu, o le vavega o vavega, o

le uiga o lea mea; o le vavega tupito lea na faia e le Atua; E le gata na faia e ala i lona lava Alo pele e toatasi, A o le mea foi e leai, leai lava se malosi po o se poto na te mafai, ona toe faaola mai se tagata ua tolu aso talu ona oti. O le vavega foi o le “TOETU” o le Alofa Tunoa lava lea, ua foaifua mai e le Atua mo le lalolagi ina ia ola, e ala i le talitonu ma faatuatua i ai; Ma o le uiga lea, po o le faamamafa o la tatou Mataupu o lenei Aso Sa. O le faatuatua i le “Toetu o Iesu” o le ala lena e tasi mo tagata uma e fia maua le Ola faavavau. Ma o le uiga lena o la tatou Mataupu; O le faamoemoe ola; po o le faamoemoe mautinoa, mo le ola e faavavau, o le faatuatua ma talitonu i le Toetu o Iesu. O le toetu foi o Iesu, ua faamausaliina ai lo tatou talitonuga. O le Atua o le mafai ma le pule, e aoao i mea uma, e oo lava i le faavavau.

O le tusi sa tatou faitau nei, o le tusi a le Aposetolo, o faailoa ai le faamanuiaga a le Atua, mo i latou uma ua sausuina i le toto o Iesu; po o le faapaiaina lava lea i le toto o le taulaga na osi e le Alii, e ala i le talia ma faatuatua i lona Toetu mamalu. O lo o fa’aalia ai foi le faafetai i le Atua, ona o lenei Alofa tele, ua fanaufouina ai i tatou. E ui lava ina fetai ai tatou ma tigā ma faanoanoaga i le ola nei, ao tofotofoga e aoga i lo tatou ola faatuatua. E ui foi ina tatou lē vaaia o ia, a o le taui o lo tatou faatuatua faamaoni, o le faaolaina faatasi ma Keriso i lona Toetu mai. O lo tatou tofi foi lea e le pala lava, o lo o teu i le lagi e lo tatou Alii, e ala i lona Toetu mamalu.

Fanau, faatuatua ma talitonu ia Iesu Toetu, lo tatou faamoemoe mautinoa mo le ola e faavavau.

### **GALUEGA FAATINO:**

Taliga Fesili (Fa’aaoga lau Tusi Paia e tali mai ai fesili)

1. O le f (3) o i ai le fuaitau lea; “O lē na fanaufouina i latou ona o lona alofa tele,” (i) O ai e faatatau i ai le “lē”?  
(ii) Faamatala mai po o le a le uiga o le fuaitau lea!

Tali: (i) O le “le” o faatatau i le Atua.  
(ii) O le fanaufouina o tatou e le Atua e ala i lona alofa tele, o le faafouina lava lea, po o le faamagaloina o tatou e le Atua, e ala i lona Alofa, po o le taulaga e ala i le Toetu o Iesu.

2. O le f (7), faamatala mai le uiga o le fuaitau o amata mai le fuaiupu lea “O le tofotofoga foi .....e faaumatia”

Tali: O le tofotofoga o le faatuatua o le tagata, o se mea faigata ae a manumalo mai ai, e le toilalo i le leaga po o le agasala, e sili mamao atu nai lo le auro.

3. O le faaiuga lava o le f(11) o i ai upu ia; “ma le mamalu e mulmuli ane ai” O le fuaitau lea e faatatau i le a?

Tali: E faatatau i le Toetu manumalo (Toetu mamalu) o Iesu mulimuli ane, ina ua mavae lona maliu.

**PESE:** 152 “Iesu e malie loto...”

### **A’OA’OGA:**

1. O le faatuatua, o le ala i le ola atali.
2. Faamoemoe i le Atua e manuia ai.
3. Talia le Toetu o Iesu.

.....

**ASO SA: 24 APERILA 2022**

**MATAUPU: INU MALIE I LE ALOFA O LE ATUA**

**SINI:** Ia a’oa’o tamaiti ia latou iloa, o le Alofa o le Atua, na te faamalie le galala o le tagata puapuagatia.



**TUSI FAITAU:** Salamo 107: 1 – 9

**FESOASOANI MO FAIAOGA:**

O le lalolagi, po o tagata e talitonu ma faatuatua i le Toetu mamalu o Iesu, sa faamanatu i le Aso Sa ua tuanai; O i latou na ua lē toe lagona se matelaina, po o se galala i le itu faale-agaga, auā ua maua’ a le talitonu ma faatuatua i le Atua, ma ua tumau ai e faavavau i lona Alofa. O le Alofa e malie ai le tagata i le itu i le tino, atoa foi ma le itu faa-le-agaga.

O le vaega tonu o le pese, po o le Salamo sa tatou faitauina, o lo o atagia i le itu lea; o le faamalieina o le galala o le tagata i le itu faale-agaga, i le Alofa foai mai, ma tausii mai o le Atua. O le pogai lea o le pese o le agaga faafetai i le Atua i lona alofa lavea’i ua inu malie ai. O le Salamo, o atagia ai le toe foi mai o le tafeaga, ma ua lagona le fiafia, lea e alalaga ai e pei ona amata le pese; “Vivii atu ia outou i le Alii, auā e lelei lava o ia auā e faavavau lava lona alofa.” Ona lagi faasolo lea o mafaufauga i faigata sa fetai ai, ma le lavea’iina ua faia e le Atua, o le faaolataga lea mo i latou, mai lima o e sauā sa nofo pologa ai. Sa pei i latou o tagata fesetai i le vao matua, ua leiloa le auala e ui ai, le maua se nofoaga lelei e mapu ma malilie i le latou ola. Sa fia feinu ma fia aai; ae sa sili ona galala o latou loto, ona ua leai se faasinoga faa-le-agaga, e to’omaga i ai, auā ua o ese ma le Atua. Ona alalaga lea ma valaau i le Atua, le Atua o faatali pea, pe i ai se taimi e toe manatu atu ai lona nuu faatafae ia Ia; Lea la ua tali mai le Atua i lona Alofa, ua ia toe aveese mai i latou mai le pologa sa tigā ai, ae toe faafoi i lo latou nuu, e ola fiafia ai. Ona faaii lea le vaega o le pese sa tatou faitau i le alalaga e pei o se tautinoga f. 8 – 9. Ia vivii i le Atua e le aunoa, ona o lona Alofa e ala i vavega na ia fai, ua ola ai i latou. Ua le gata ina saoloto, ua leai se toe fia inu, leai se toe fia ai; auā ua maua mea uma; ae ua sili ona faamalieina le galala sa i ai faa-le-agaga, talu le o ese mai le Atua.

Tamaiti, ia tatou talitonu, o le Alofa o le Atua mo tagata e pei o tatou, e le gata ina faamaoni, ae tatou te matuā malilie atoatoa

ai; pau le itu; ia tatou talitonu ma faatuatua i ai. Le alofa e ala i le Taulaga o le Faaolataga sa faia e Iesu mo le lalolagi uma.

**GALUEGA FAATINO:** Tusiga Solo

Tusi sau solo e faailoa ai lou loto faafetai i ou matua, ona o la laua tausiga alofa ia te oe, ua e ola fiafia ma manuia ai. (O le agalelei o ou matua, o le Alofa lava lena o le Atua) Tolu fuaiupu, 4 laina i le fuaiupu e tasi.

**PESE:** 125 “Ua faafetai Alofa, malie valaau...”

**A’OA’OGA:**

1. Na o le Atua lava, e malie ai le galala faa-le-agaga.
2. O le loto faatuatua i le Atua, e le uma le faafetai.
3. E faamaoni le Alofa o le Atua.

.....

**ASO SA:** 1 ME 2022

**MATAUPU:** UA MAO SASALU HAMANU

**SINI:** Ia a’oa’o tamaiti ia latou iloa, o le ola faufau leaga i le isi tagata, e ono toe aafia ai lava.

**TUSI FAITAU:** Eseta 6: 1 – 11

**FESOASOANI MO FAIAOGA:**

O le upu “Mao”, e lua ona uiga eseese. Muamua; “o le tupu faafuasei e lei mafaufauina,” po o le “oso sesē.” A o le isi ona uiga, “o le le-tupu”, po o le fiu. O le upu “sasalu,” e uiga i le “naunautaiga” po o le “faamoemoe i se mea”

O le uiga lona lua o le upu “Mao” e fetau i la tatou mataupu; O lona uiga, ua fiu Hamanu e tatali le mea sa faamoemoe ma naunau i ai, e lei tupu; ae ese le mea ua oo i ai. “Ua mao sasalu Hamanu.”

E fia faataua la i la tatou mataupu; “Le to’amalie ma le loto maulalo.” Auā, pe a oo atu i le iuga, o se faamanuiaga mo lou tagta. Ae po o se isi foi tagata e manuia, e leai a se mea o le a e tigā ai fua, auā o lo o sologa lelei ma e toamalie pea, auā e te lei mafaufau fua i se isi e pei ona faia e Hamanu.

O le tala la sa tatou faitauina, o le tala ua tatou faalogo soo i ai. O Hamanu, o le auauna e sinia toe maualuga i le saofaiga, po o le au fai tonu a le tupu. O se tagata e ita tele ia Moretekai ma tagata sa Iuta. E sailiili lava e Hamanu se mea leaga ai Moretekai, e pei o lona manatu o taua i le f.4. O lona loto lea e fasiotia Moretekai e ala i le faasatauro i le laau ua uma ona ia saunia. Ae o le tala i nofoaiga a tupu, o lo o faamau ai le lavea’iina o le tupu o Asueru e Moretekai, ina ua ia ta’u le taupulepulega a eunuka e fasioti le tupu. Ona e lei i ai se taua o faamauina na fai mo Moretekai ona o le mea lelei na ia faia. O lea na fesili ai Asueru ia Hamanu lana auauna sinia, po o le a se mea e loto e fai i le tagata o le a finagalo le tupu e faaneeneina. O le manatu o Hamanu, o ia lea o le a faaeaea i ai le tupu; le ala lena na ia tolaulau atu ai mea uma o i le f 6 – 9, ma lona manatu o ia. Peitai, ua ese lona naunautaga; le mea sa manatu i ai; ma le mea ua tupu, ona e le o ia, a o lona fili ua faaeaina e le tupu; o lea sa matuā tigā ai o ia.

Fanau, o le tala lena. E lē lelei le ola faufau i isi, ma le faamaualuga ma manatu ifo, o oe lava e sili; auā e te fiu ai e faatali, ae ese le tagata o tauia e le Atua. Na alalaga foi le toatele ma fiafia ua maliu Iesu; ma le le iloa, o le Taulaga faaola na ia saunia e ala i lona maliu, ma lona toetu mai manumalo, o le manuia mo i latou o faatuatua ia te Ia!

**GALUEGA FAATINO:** Taliga Fesili

1. O le a le mea na mafua ai ona le maua se moe a le tupu?

Tali: E le o taua i le tala, ae masalo o tau iteite le tupu, o i ai se mea e ono tupu.

2. O le a le mafuaaga na alu ai Hamanu i le lotoa?

Tali: Na alu e fai i le tupu e faatautau Moretekai i le laau ua uma ona ia saunia.

3. O le a le mea na mao sasalu i ai Hamanu?

Tali: Sa faapea lava Hamanu, o ia lea e manatu le tupu e faaneeneina, peitai e leai, e le o ia, a’o Moretekai.

4. O ai na faatinoa mea ia na loto ai Hamanu e tusa o le finagalo o le tupu?

Tali: O Hamanu lava.

5. Sa fiafia Hamanu ma fai le finagalo o le tupu pe leai?

Tali: E leai.

**PESE:** (368) “Fai mea tonu, o mea lelei...”

**A’OA’OGA:**

1. ‘Aua le ola faufau i le isi tagata.
2. Tautala i le sa’o.
3. E tauia le faamaoni.

.....

**ASO SA:** 8 ME 2022 (ASO SA O TINĀ)

**MATAUPU:** AVEA MA TINĀ E SUSULU ATU

**SINI:** Ia a’oa’o tamaiti ia latou iloa, so o se mea lelei e te fai, o lou faasusulu atu lava le na o le malamalama.

**TUSI FAITAU:** Filipi 2: 12 – 18

### **FESOASOANI MO FAIAOGA:**

O le tusi lenei i le Ekalesia i Filipi, ma so o se tagata talitonu ia Iesu Keriso e faitau ai, sa tusia mai e le Aposetolo, a o i ai i le fale puipui i Roma. O le aulotu muamua lea i le konitineti o Europa, sa faatuina e Paulo ma lana au-malaga, i lana malaga faamisionare lona lua, e taua i le tusi o Galuega 16: 11 – 40. Sa auina e le Ekalesia a Filipi Epaferoti, ma le meaalofa mo Paulo o taua i le mataupu e 4: 18, a o i ai i le falepuipui i Roma.

O le tusi la, o le momoliga mai o le faafetai a le Aposetolo mo le Ekalesia a Filipi, faatasi ma lana faamalosi i le Ekalesia ma i latou uma e talitonu ia Iesu, e ala i lona faailoa atu ia i latou; “O le fiafia moni lava, e mai ia Iesu Keriso, na o ia lava.” O le faafetai a le Aposetolo; ona sa i ai i le amataga o le Ekalesia, sa fa’aalia lo latou gauai, ma lo latou anaana i le Aposetolo ma mea uma tau le Alii, sa ia a’oa’o ma faatonu atu. A o lea ua alu ese, a o lo o fa’aalia lava lo latou agalelei, ma le gauai. O le faailoga lea o lo latou talitonu, ma lo latou talia o Iesu, e le na o le taimi sa faatasi ai ma le Aposetolo, a’o lea ua leai, a’o tumau pea lo latou olioli i le Alii, o afua ai ona faia o ia mea uma. O le Aposetolo i lona faafetai, ona o lo o ia iloa, o lo o galue le Atua i totonu o loto o Filipi, lea e mafua ai ona latou galulue fiafia, e tusa o mea o finagalo malie ai le Alii. O le Atua foi o faavae ai lo latou ola matata’u, ma fiafia ai e fai mea lelei.

E iloa o le Atua o galue i totonu o loto o Filipi, pe afai latou te faia mea uma i le loto-faatasi, ma le leai o se muimui. O iina foi e iloa ai o latou o le fanau a le Atua, e le tauleagaina i se mea; Ae o avea ma malamalama o susulu atu i le pogisa o i ai tagata finau vale, ma tupulaga amio piopio, o tagata le talitonu lava ia i le Alii o Iesu Keriso. O le fiafiaga tele lea o le Aposetolo, ina ua taunuu Epaferoti ma le meaalofa, faatasi ma le tala fiafia o le galuega. Tautino foi e le Aposetolo, afai lava o lona iuga lea; e alu ma le matua olioli faatasi ma tagata faatuatua o Filipi; Auā e le gata ua tau aogaina lona momoe mo Keriso, a ua sili ina ua

faasusulu atu e le Ekalesia o Filipi le malamalama o Keriso, e ala i lo latou ola matatau ma le faia o mea lelei o finagalo ai le Alii.

Tupulaga, ia fai i tatou ma malamalama susulu atu o le Alii, e ala i lo latou aoga, ava, fa’aaloalo, ma loto maulalo i so o se tagata. O Iesu foi, sa ia faia mea silisili e pei ona taualuga ai i le Taulaga faaola na ofo atoa i ai lona soifua, ina ia ola tagata uma e faatuatua i le Atua.

### **Uiga o Upu:**

1. f (12) anaana - usiusitai/faalogo ma talia/gauai

### **GALUEGA FAATINO:**

Matematega: (Fa’aoga lau Tusi Paia, faitau ma mate mai tali sa’o o fesili o tuuina atu)

1. O le fuaiupu e fia; ae o le a foi le fuaitau; e iloa ai e le o muta le faalogo ma talia e Filipi le mea na fai atu ai Paulo?  
Tali: (i) o le f 12  
(ii) Fuaitau – faapea ona outou anaana mai e le aunoa.
2. E faafefea ona avea Filipi ma Ekalesia, po o tagata ua sa’o amio ma ua le tauleagaina?  
Tali: Pe afai latou te faia mea uma ma le leai o se muimui, ma le leai foi o se finauai.
3. O fea e sau ai le malosi lea e mafai ai e Filipi ona fai mea o finagalo ai le Atua? O le fuaiupu e fia e iloa ai?  
Tali: (i) E sau mai le Atua  
(ii) O le f.13

4. O le a le uiga o le mitamita o Paulo ta'ua i le f.16; i lona fai mai "ua ou le momo'e faaleaoga, pe galue faaleaoga"?

Tali: O le fiafia o le Aposetolo, ua aogā lona momoe i feau a le Alii, ma galuega a le Alii. E iloa ua aogā, i le talia fiafia e Filipi o lana galuega sa fai mo latou i le Alii, na faatuatua ma talitonu ia Iesu Keriso, ma ua susulu atu lo latou lelei i le lalolagi.

5. O le mea lea e olioli ai Paulo ma Filipi i le f.18, e tutusa a ma le mea o taua i le fesili no 4?

Tali: Ioe! O lona lava.

**PESE:** (363) "Ia susulu atu o i tatou"

#### **A'OA'OGA:**

1. Talia Iesu i lou loto.
2. Fai le mea e finagalo malie ai le Alii.
3. Fai lou ola ma malamalama susulu atu.

.....

**ASO SA:** 22 ME 2022

**MATAUPU:** O LE FAATUATUA TO'AFILEMU

**SINI:** Ia a'oa'o tamaiti ia latou iloa, o le faatuatua, e tino foi i le ala maualalo ma le to'afilemu.

**TUSI FAITAU:** 1 Tupu 18: 1 – 16

#### **FESOASOANI MO FAIAOGA:**

O le mataupu atoa lenei 1 Tupu 18: 1 (ff), e matauina gofie i le osiga taulaga a Elia ma perofeta a Paala; Ae o le vaega sa faitauina (f.1-16), o aumai ai la tatou mataupu o lenei taeao, o fa'aautu i le tagata e igoa ia Opeteia. O Opeteia o le tagata talitonu ma faatuatua i le Atua, e ola mata'u ia te Ia (f.3), ae o le auauna pule i le aiga o Aapo le tupu o Isaraelu.

O Aapo o le tupu faapaupau, sa ia lafoa'i le Atua o Isaraelu, ae tapuai ia Paala. O le soifuaga o le tupu ma lona gauai i le ola faapaupau, e a'afia tele mai lona toalua, ma le sioisiomaga sa ola a'e ai. O lo o taua lona olaga faapaupau lea ma ona aafiaga i le Mataupu e 16: 29 – 34. O le Mataupu e 17: 1, o le valoaga a Elia, e le toe i ai se timu mo taimi umi, seiloga e toe foi mai. O le vaitaimi lea o le naumati o le eleele, ma le tele o le a'afiaga o mea sa faalagolago i le timu; na tua i le fasiotia uma e Iesepela le avā a Aapo o Perofeta a le Alii. A o le taimi tonu foi lea sa auauna lava Opeteia i le tupu, ma fai lana galuega alofa i auauna a le Atua o ta'ua i le f.4.

Sa ia avea faalilolilo Perofeta a le Atua e toa selau, ma faalalafi taitoa limasefulu i totonu o ana. O ia lava foi taimi na te iloa e tatau, e alu ai e ave areto ma vai e tausii ai i latou, ma lavea'iina ai o latou ola. O se auaunaga alofa, sa faatino lava i se ala to'amalie, i totonu o le matautia ma le lamatia o lona ola. O le velavela lea o le oge ma le naumati o le eleele i le leai o se vai, na faatonu ai e Aapo Opeteia e alu e ta'amilo i le aai, pe maua se mutia ma se vai, sei lavea'iina ai solofanua ma faalata a le tupu. A o iina na fetau ai ma Elia e pei ona ta'ua i le f.7-16. Na ta'u atu le manao o Elia ia Opeteia, e alu ia Aapo e fia maua se feiloaiga, auā o lea ua toe foi mai o le a toe faatoto ifo uaga i le eleele i le pule a le Atua. Peitai, faatoa iloa ai iina e Elia, e le na o ia le tagata faatuatua i le Atua o i ai. Na ta'u i ai e Opeteia lana gaoioiga alofa na fai i Perofeta a le Alii, o ta'ua i le f.13. O lona uiga o laua uma (Elia ma Opeteia) o i lalo o le lisi faatalitali a le tupu, pe a sasi le faatatau, auā o laua uma o tagata o le Atua.

Ona la fai lea le feutagaina lelei, ma tu'u i le Atua alofa latou te au ma Ia, e taunuu manuia ai me auma.

O le lui lea mo tatou fanau; ia maua pea le to'afilemu o le Atua, i taimi o le lē taugamalie o tiute ma valaauina. Faifai lemu ma faatuatua pea, faalagolago ma le talitonu, e fesoasoani mai le Alii i so o se mea lelei tatou te fai. O Iesu foi i lana galuega, sa fesouaina lava e faigata, ae sa faalagolago lava i le taitaiga a le Atua lona Tamā, lea na iu i le taulaga faaola na ia faia.

### **GALUEGA FAATINO:**

Tusi mai, pe faapefea ona e tausia Perofeta ia e toaselau a le Alii, pe ana o oe o Opetaiā! (O lau tali, e aofia ai le taimi, au gaoioiga e fai, e fua o oe o le auauna sili, e vaia le maota ma eleele o le tupu, ma mea uma)

**PESE:** 177 (Galue ia seia uma ai)

### **A'OA'OGA:**

1. Mata'u i le Alii e pei o Opetaiā.
2. Au ma le Atua i mea lelei e te faia.
3. Galue e lavea'i nisi tagata.

.....

**ASO SA:** 29 ME 2022

**MATAUPU:** FAI LE MEA SILI ONA TATAU

**SINI:** Ia a'oa'o tamaiti ia latou iloa, o le mea sili ma tatau i le silafaga a le Atua, o le fai o le mea amiotonu ma alofa.

**TUSI FAITAU:** Esoto 23: 1 – 9

### **FESOASOANI MO FAIAOGA:**

O le tusi lenei, Esoto 23, o lo o aumai o ni vavao po o ni tulafono, mo le faamausaliina o le amiotonu ma le alofa i totonu o le sosaiete. Auā o natura ia o le soifuaga o tatou i ai nei, e sili ma tatau ona tatou ola ai, auā e fia silasila mai i ai le Atua. Le ala lena o le vaoia mai o le fai o se tala fatu fua i le f (1); pe au ma le tagata amio leaga; auā o lena lava ua e saua, e ala i lau molimau. O le f 2 – 3, o aliali mai ai le uiga masani lea, o le suia o le faamasinoga tonu ona o le tupe. O le lapataiga la, 'aua le mulimuli i le toatele e fai ai pea le leaga e ala i lau molimau; po o le mau-oloa po o lē foi e mativa, o le mea taua, ia tutusa i lau vaai, ma ia faia le amiotonu.

E i ai vaega o le Feagaiga Tuai, o faapea mai; "E taui le nifo i le nifo, po o le mata i le mata." Pei o le fua lea sa fua ai le sa'o ma le tonu; ma o le ala lena, e foliga ai e fou le auala lea, "O le alofa i ou fili," i le lalolagi o le taui ma sui o tatou i ai nei. Lea la ua aumai e le Atua le mafaufauga po o le tomā fou lea ia Isaraelu, ae o se tulafono foi. "A e tau atu i le povi a lē o fai ma ou fili, po o lana asini ua sē, alu e toe ave i ai i lea tagata." Tusa lava pe avea lea mea ma ala, e foliga ai ua faatigaina oe e le fili; A o molimau le faataoto o tusia i le Luka 10: 30 – 37, O foliga na o le alofa o finagalo ai le Atua, e tatau ona tatou faia. O lo tatou fa'aaogaina foi o le tulafono a le Atua, o le alofa lea, e talafeagai mo o tatou fili; o le faailoga lena o lo tatou ese mamao mai le lalolagi.

Fanau, ia tausisi i le mea moni ma le alofa, e sologa manuia ai le ola, auā e fia silasila mai ai pea le Atua ia i tatou. O Iesu foi, e leai se mea e tasi na pona ai lana auaunaga i le ola lenei, ona o le tausisi i le finagalo o lona Tamā, o le Atua o le moni ma le alofa atoatoa.

### **GALUEGA FAATINO:**

Taliga Fesili (Fa'aaoga lau Tusi Paia)

1. O le a le uiga o le molimau faasaua, o vaioa mai i le f. (1)?

Tali: O le molimau pepelo lava lea.

2. O le a le manatu tonu o tautala i ai le vavao o i le f.3?

Tali: E moni, o le finagalo o le Atua ia tatou alolofa i tagata matitiva; Peitai, o le autu o le mataupu o le alofa ma le amiotonu. Tusa lava la pe mativa, ae afai e le tonu, ‘aue nei ave le mativa ma ala e te molimau ai, pe ‘au i ai, ae sesē; Auā la, o le alofa foi le uiga o le mea lena. Tusa o lena ua e fesoasoani, e fai pea le sese e ui ina e le sa’o.

3. O le a lau faitau. E foliga tutusa le f.3 ma le f.6?

Tali: Ioe! E auga lava i le mea e tasi.

4. O le tagata amio leaga o ta’ua i le f.7, o ai o faatatau i ai, e tusa o lau faitau?

Tali: E faatatau i le tagata pepelo; o le tagata lava lea o ia fasiotia le tagata e leai se sala, po o le tagata amiotonu foi.

5. O a a’afiaga o le talia o le mea-alofa mai tagata o ta’ua i le f.8?

Tali: (i) Faatauaso ai le vaai.  
(ii) Faasese ai upu, po o le pepelo ai foi lava lea o le tagata amiotonu.

**PESE:** 145 “Maeu le molimau..”

#### **A’OA’OGA:**

1. Fai le mea e finagalo ai le Atua.
2. ‘Aua e te pepelo.
3. Alofa i lou uso.

.....

## **MANATU TAIALA O IUNI: O MEAAI E OLA AI LE AGAGA**

Ua silafia e le Atua le mea tatou te lelei ai. Ua ia aumai ai ana Afioga, ma tulafono ma ana faamasinoga tonu, e fafaga ai o tatou agaga, ina ia tatou maoona ma malilie ai, i mea lelei ua uma ona ia saunia. Auā o meaa i mo tatou tino, ua uma ona ia tapenaina e pei ona i ai le foafoaga aoao. Pau lava la tatou mea e fai, o le galueaina ma atinaeina le eleele ona fua mai lea ma maua ai meaa i mo tatou tino.

**ASO SA:** 5 IUNI 2022

**MATAUPU:** TAIALA O LE OLA I LE AGAGA

**SINI:** Ia malamalama le vasega, o taiala o le ola i le Agaga, o tulafono ma faamasinoga ia, e a’oa’o mai e afioga a le Atua ma ana Tusi Paia, ia faalogo, usiusitai i ai ma ola ai i aso uma, ona maua lea o le manuia.

**TUSI FAITAU:** Teuterenome 4: 1 – 14

#### **FESOASOANI MO FAIAOGA:**

O le tatou tusi faitau i lenei Aso Sa, o le valaau a Mose i tagata Isaraelu, ia faalogo ma usitai uma i tulafono ma afioga a le Atua ina ia latou manuia ai i le nuu ua folafolaina atu e fai mo latou tofi.

O taiala o le ola i le agaga, e fai ma taitai ala i mea uma latou te faia, ina ia latou foliga ai pea i fofoga o le Atua, ma saga ola manuia ai. O upu e sefulu, po o tulafono na lolomiina i papa ma’a e lua, ia a’oa’o i ai, faalogo ma lagona i le loto, ma usitai i ai ma ola ai i aso uma, o le faailoga lea ua i ai ia te oe le pote mai le Atua. O tulafono e sefulu, e pei ona faamauina i le Esoto 20: 3 – 17, ia a’oa’o soo i ai, ma tusi i papa aano o latou loto, ia

fai ma mea suamalie mo latou agaga, ina ia fau ma soloi lo latou manuia mai le Atua. Ae le gata i lea, ia matua mamao lava ni puapuaga ma ni faigata e oo atu ia i latou. Auā o le Atua ua afio tumau ma i latou, o faamasinoga foi latou te faia e tonu ma lelei lea i le silafaga a le Atua.

Ua le na o Isaraelu foi, ua faatatau i ai lenei valaau, ia faalogo ma usitai, a ua faia mo tagata uma e fananau mai i le lalolagi, e aofia ai ma i tatou. Auā foi tatou te moomia lo tatou Atua i taimi uma, ma tulafono e mai lona fofoga, o meaai ia mo tatou agaga, e pei ona faamauina Teuterenome 8: 3. E le na’o mea e ai e ola ai le tagata, a o mea uma e tulei mai i le fofoga o le Alii. E le o toe faigofie nei aso, i le mau mea fou e faaseseina o tatou olaga. Peitai, a mauaa afioga ma tulafono a le Atua i lou loto ma tatou agaga e fai ma taiala o lo tatou ola i le agaga, ua lava lea e na te lavea’i mai i tatou ai le leaga. O le poto foi lea mai le Atua e na te faafeaoina oe ma au nei osofaia i tatou e le tiapolo i ana faiga tau faaleaga.

O Iesu Keriso le faataitaiga sili mo i tatou. Sa ia faalogo ma usitai i tulafono ma afioga uma mai le fofoga o lona Tamā lo tatou Atua, na Ia mafai ai ona faataunuuna le faaolataga tele mo tagata uma o le lalolagi e ala i lona maliu ma le toetu mamalu mai le oti ma le tuugamau.

### **GALUEGA FAATINO:**

Tusi mai tulafono mulimuli e ono, faapuupuu

1. Ia e ava i lou tama ma lou tina.
2. Aua e te fasioti tagata
3. Aua e te mulilua
4. Aua e te gaoi
5. Aua e te molimau pepelo
6. Aua e te manao fua i mea a isi tagata.

**PESE:** Pese ma Viiga 120

### **A’OA’OGA:**

1. Ia faalogo ma usitai i tulafono a le Atua.
2. Ia a’oa’o ma ola i tulafono a le Atua.
3. Ia fafaga lou loto i afioga a le Atua.

.....

**ASO SA: 12 IUNI 2022**

**MATAUPU: O LE VAI OLA**

**SINI:** Ia malamalama le vasega le vai ola, o le vai e puna mai le Agaga o Iesu Keriso le Faaola, e malie ai agaga o tagata ua galala i le fia inu i le Atua.

**TUSI FAITAU:** Ioane 4: 10 – 15

### **FESOASOANI MO FAIAOGA:**

Ua fetalai atu Iesu i le fafine Samaria (Ioane 4: 10) Ana e iloa le mea foai fua a le Atua, ma le ua fai atu ia te oe, Au mai ia te a’u ou te inu, po ua e ole mai ia te ia, na foa’i atu lea e ia ia te oe o le vaiola.

E le mafai e se tagata agasala ona ia iloa manuia o le Atua, auā foi o lo o faapogisaina e le tiapolo, ma saisaitia ai tagata i le pologa o le ola agasala. O le vaiola o le mea foai fua a le Atua mo tagata uma. O le a lea mea foa’i fua? O le Agaga o le Atua. A oo ina inu ai le tagata, ona faamalieina lea o lona galala i le Atua. E puna mai ia te ia le alofa, lē faailoga tagata, le amio lelei, ma le tausaaafia ma le tauagafau, ma ua fiafia foi e tapua’i i le Atua, ma tatalo i aso uma, auā ua ia iloa ua puna i totonu ia te ia le vaipuna o le faavavau.

O le ola agasala o le fafine Samaria, ma lona tausisia pea o tu ma aga a Iutaia ma Samaria o le faailoga tagata, ua suia ina ua

suluia i le malamalama o Iesu Keriso, o le puna o le vaiola e puna i le ola faavavau.

O le a le mea e ta'u o le ola faavavau? O le soifua o lo o soifua ai le Atua lo tatou Tamā, ma Iesu Keriso lona Alo Pele, o lo tatou Faaola, ma le Agaga Paia o lo o puna mai mo i tatou ina ia tatou feinu ai, ma tatou ola faavavau ai.

O le vaiola lea ua inu ai le fafine Samaria ua suluia i le malamalama o le amiotonu a le Atua ma ua faaolaina ai, e pei ona fai mai le Salamo 36: 9 Auā o lo o ia te oe le puna o le ola, o lou malamalama matou te iloa ai le malamalama.

O le tatou mataupu lea i lenei taeao. Ona pau lea o le auala e faasaoina ai i tatou mai le tele o faigata o le lalolagi ua tatou feagai nei. Ia saili ma tatala o tatou loto, ina ia tafe i totonu, ma maua ai le malamalama o le Atua, e faamalieina ai lo tatou galala i mea lelei uma lava.

Ia manatua o le vaiola, o le Agaga lava lea o le Atua, o lo o puna i luga i le ola faavavau, afai tatou te feinu ai, ona tauia lea o lo tatou faamomoe pe a mavae lenei ola. Ia manuia le Aso Sa.

### **GALUEGA FAATINO:**

1. O se e inu i le vai ou te avatu ia te ia, e le toe fia inu lava ia, a o le vai ou te avatu, e avea i totonu ia te ia o le vaipuna, e puna i luga o le ola faavavau.

Vaevae le vasega i vaega se lua, ona fa'aali lea o manatu i le uiga o lenei fetalaiiga a Iesu.

**PESE :** Pese ma Viiga 123

### **A'OA'OGA:**

1. O Iesu o le puna o le vaiola
2. Ia tatala loto, ina ia tafe atu i ai le vaiola.
3. O le Agaga Paia o le vai o le ola.

**ASO SA:** 19 IUNI 2022

**MATAUPU:** UA VALAAU LE POTO

**SINI:** Ia malamalama le vasega, ua valaau le poto e pei se tagata, e valaaulia tagata uma, ina latou faalogo ma a'oa'o i ana faatonuga ma aoaiga ina ia latou maua o ia, e lavea'i mai i latou ai le leaga.

**TUSI FAITAU:** Faataoto 1: 20 – 33

### **FESOASOANI MO FAIAOGA:**

Ua valaau le poto, e valaaulia tagata uma, ina ia latou lagona, ma liliu mai e faalogologo i ana aoaiga ma faatonuga. O le nofoaga o lo o fa'aaoga e le poto i lana valaaulia, o le malae e i totonu o le faitotoa o le aai.

Aua foi o le nofoaga lea e tumutumu i ai tagata, e ave i ai a latou mataupu e fai i ai le faamasinoga a le tupu o Isaraelu.

E tolu lava ituaiga tagata, o lo o valaaulia e le poto, o lo o alaga atu i ai ma le leo tele, ina ia ua'i mai la latou faalogo ma lagonaina lana aoaiga ma lona a'oa'o atu i ana poloaiga. O tagata muamua o lo o alaga atu i ai le poto, o tagata ia o lo o ola i le olaga faigofie. O lona lua o tagata, o e tauemu, ma lona tolu o tagata vālea.

O tagata faigofie, o i latou ia o lo o ola i se olaga maulalo, e le mananao e suia o latou olaga mai le mea ua masani ai. E tusa lava pe maulalo ma agasala le tulaga o i ai, ua manatu lava o ia ua leai se afaina o i ai.

O tagata tauemu, o le fili matautia lea o le poto. Auā foi, o taimi uma e lagona ai le aoaiga ma le a'oa'o atu a le poto, na o le ataata lava, ma fiafia i le a'oa'o atu, ma fiafia ai lava i le olaga tauemu.

O tagata valea, o i latou ia e fai mo latou fili le poto. E matua inoino, ma tutuli o latou taliga i a'oa'oga a le poto. E le mana'o



e fai se mea ia lelei, ona na'o mea leaga e fiafia e fai, e pei ona fai mai le Faataoto 17: 7 & 21. E le ono i laugutu o le vale ona tautala i mea sili ona lelei, ae matuā le ono laugutu pepelo i le Alii. O le na te fanaua le vale, e fai lea ma ona faanoanoaga e leai foi se fiafia i le tamā o lē ulavale.

Fai mai le fuaiupu e 23 o le tatou mataupu, liliu mai ia i lau aoaiga; faauta, ou te liligi atu lo'u Agaga ia te outou, ou te faailoa atu a'u upu ia te outou. O lona uiga, o le poto o lo o alaga, o le Atua lava lea, ua ia valaauina i tatou tagata uma, ia tatou faitau i le Tusi Paia, o lo o i ai ana afioga o ana aoaiga ma ana tulafono, ina ia tatou faalogo i ai ma usitai i ai, ma tatou ola ai i aso uma, e maua ai le poto mai ia te Ia. E na te liligi ifo foi lona Agaga ia i tatou, na te faailoa mai ana upu ia i tatou.

E pei ona fai mai le Faataoto 8: 35 Auā o lē ua maua a'u, o le poto lea, ua maua e ia le ola, e maua foi e ia i le alofa mai le Alii.

Ioe, o le naunautaiga lea o le tatou mataupu o lenei Aso Sa, ina ia mafai lava ona tatou maua le poto o le Atua, e manuia ai o tatou olaga, ma tatou ola fiafia ai i lenei lalolagi o puapuaga.

O Iesu Keriso o le poto o le Atua, ua afio mai i le lalolagi, e faailoa mai ia i tatou le poto moni mai le Atua. Ia manuia le Aso Sa.

### Uiga o Upu:

- i) taalili - leotetele
- ii) faigofie - o tagata ola faasamasamanoa, na o le ola lava.
- iii) faatalanoa - ola le magafagafa

### GALUEGA FAATINO:

1. Vaevae le vasega i vaega e tolu.

Ona tuu lea i ai, e aumai ni a latou faauigaina ma manatu i ituaiga tagata e tolu, o lo o alaga atu i ai le poto:-

1. Tagata faigofie
2. Tagata tauemu
3. Tagata valea.

**PESE:** Pese ma Viiga 237

### A'OA'OGA:

1. Ia talia le aoaiga a le poto.
2. E faafeao oe e le poto o le Atua.
3. E lavea'i oe mai le leaga, e le poto

.....

**ASO SA: 26 IUNI 2022**

**MATAUPU: AFIGA A LE ATUA E POPOTO AI**

**SINI:** Ia malamalama le vasega, o afioga a le Atua e popoto ai, pe afai e toaaga e faitau i ai, faalogo ma usitai i ai, ma ola ai i aso uma.

**TUSI FAITAU:** 2 Timoteo 3: 10 17

### FESOASOANI MO FAIAOGA:

O le tatou mataupu i lenei taeao o le Aso Sa 2 Timoteo 3: 10 – 17, o lo o faatauaina ai lava le poto o le Atua, e tatau ona mauaa i loto ma mafau o tagata uma o lo latou faaolataga lea ma ia te Ia.

O le mea lea ua matua a'oa'o atu ma faamalosi'a'u ai le Aposetolo o Paulo, i lona atalii faaleagaga o Timoteo. A'o o oe ua e iloa lelei la'u a'oa'oga o la'u amio, o le loto mau, o le

faatuatua o le alofa ma onosai. O le tele ia omea tiga ma sauaga ua oo mai ia te a'u, a o ia sauaga na ou tigaina ai, a o le Alii na Ia lavea'i mai ia te a'u ina mea uma. Ia e malamalama o i latou uma, o e loto ina nonofo ma le amio Atua ia Keriso Iesu, e sauaina pea i latou. Peitai, o Iesu Keriso lava e lavea'iina i latou. O oe lava ia, ia e matua tumau i mea ua a'oa'oina ai oe, ma ua e mautinoa, ina ua e iloa o ia ua a'oa'oina oe. E aofia i e na a'oa'o ia te oe i le faatuatua, o Loi le tinā o lona tinā ma Eunike lona tinā, talu mai lava ona e tamaitiiti ua e iloa Tusi Paia, e mafaia ai ona faapoto ia te oe, e iu ai i le faaolataga i le faatuatua ua ia Keriso Iesu.

O tulafono, o apoapoaiga, o a'oa'oga ma aoaiga o afioga ia a le Atua, ua tusia i ana Tusi Paia e taiialaina ai lo tatou ola i faatinoga o mea lelei uma, aua e mai lona Agaga, e faatonu ma faapoto ai foi i le amiotonu.

O le Tusi Paia, o le tusi o le ola. O afioga a le Atua e atamai ai le tagata. E pei ona tautino mai le Salamo 119: 99. Ua sili ona atamai o a'u i e a'oa'o mai ia te au uma lava, auā o au tulafono ou te mafaufau i ai.

O le sini autu lea ma le mafaufau maualuga o tamā. O le EFKS, ina ia faamalosi pea Aoga Aso Sa e a'oa'oina ai fanau a le Ekalesia, ina ia latou maua le poto o le Atua, e faafeaoina i latou i mea uma latou te faia.

O Timoteo, o se tama talavou, ua fai ma atalii faaleagaga o le Aposetolo o Paulo. Ae mai lava i lona laitiiti, na a'oa'oina lelei o ia e le tinā o lona tinā, ma lona tinā i le Tusi Paia. O le a lava ua oo ina matua ma avea o se tama talavou, ua ofoina atu lona ola, e fai ma 'ave feau o le Tala Lelei a Iesu Keriso. Ae ua le gata ai i le faamanatu pea ma saga faamalosi atu Paulo, ina tumau i mea ua a'oa'oina ai o ia.

O afioga a le Atua e tatou te popoto ai. O le auupega e tasi lava lea, e lavea'iina i tatou mai mea leaga uma, ua tutupu mai i lenei vaitau o lo tatou ola.

O Iesu Keriso, na faalagolago lava i afioga a le Atua lona Tamā, na fai ma ana meaai lololo, ma vai ola e tausi ai o Ia, ina ia mafai lava ona faaolaina i tatou ia te Ia.

## Uiga o Upu:

1. loto mau - loto e le suia
2. faapalepale - tuu avanoa
3. amio Atua - o le loto ua pulea e le poto o le Atua

## GALUEGA FAATINO:

Faatumu avanoa i upu ua tusi atu i lalo: faaolataga, faatuatua, Keriso Iesu, tumau, faapoto, a'oa'oina, iloa, aoao, tamaitiiti, mautinoa, Tusi Paia, mafaia

A o oe i e \_\_\_\_\_ i mea uma ua \_\_\_\_\_ ai oe, ma ua \_\_\_\_\_ ia te oe, ina ua e \_\_\_\_\_ o ia ua na \_\_\_\_\_ atu ai ia te oe, talu foi ina o e \_\_\_\_\_ ua e iloa \_\_\_\_\_ e \_\_\_\_\_ ona \_\_\_\_\_ ai ia te oe e iu ai i le \_\_\_\_\_ i le \_\_\_\_\_ ua ia \_\_\_\_\_.

**PESE:** Faitau le Tusi Paia ma tatalo i aso uma.

## A'OA'OGA:

1. O le poto o le Atua e lavea'iina ai tatou.
2. Ia a'oa'o so'o i afioga a le Atua.
3. Ia fai afioga a le Atua ma meaai i aso uma.

.....

## **MANATU AOA O IULAI: SILAFIA E LE ATUA MEA UMA**

O le manatu taiala o Iulai. Ia iloa ma a'oa'oina tamaiti e silafia e le Atua mea uma. O a lava a tatou amio e fai, e oo i mafaufauga ma manatunatuga o tatou loto e silafia uma e le Atua. E tatau ai i tagata uma, ma tatou le fanau ona tausisi i le amio lelei, auā e fia silasila mai ai le Atua.

**ASO SA: 3 IULAI 2022**

**MATAUPU: AUA LE TOFOTOFO I LE ATUA**

**SINI:** Ia malamalama le vasega, ia 'aua le tofotofu i le Atua, aua o le Atua e lelei lava o Ia i taimi uma.

**TUSI FAITAU:** Galuega 5: 1 – 10

### **FESOASOANI MO FAIAOGA:**

O le tofotofu i le Atua, o le fesiligia lea, pe tumau pea le lelei o le Atua. E pei ona tofotofu e le tiapolo o Iesu i le vao, Luka 4: 9 – 12. Afai o oe o le Alo o le Atua, ina oso ia oe i lalo i le mea nei, auā ua tusia ; E poloai o Ia i ana agelu ia te oe, e tausi ia te oe, ma lenei foi latou te ave ia te oe i o latou lima, nei tuia lou vae i se maa. Aisea, e oso ai fua Iesu i lalo o le malumalu i Ierusalem?

O Iesu, ua faamimita e le tiapolo. Peitai, e le faamaumuina e Iesu lona malosi i ni mea vaivai ma le faavalevalea. E faapena le mea lea ua tupu ia Anania ma Safaira. O lo la fanua ua faatau atu. Na la tautino i le au-Aposetolo, afai ae faatau atu, ona tuuina atu lea o le tau o le fanua i le au Aposetolo e tufatufa i le au uso Kerisiano ma atia'e ai le Ekalesia a Iesu. Ua taulia le fanua, ona faasesēina lea e le tiapolo le loto o Anania ma Safaira, ina ia ave na o se vaega o le tau o le fanua i le au

Aposetolo, ae tuu le isi vaega o le tau o le fanua mo laua. O se gaioga ua la olegia ai le Agaga Paia.

Ina ua faavaeina le Ekalesia a Iesu i le uluai taimi na vaaia ai le aafiaga tele o tagata i le mana o le Agaga Paia, aemaise, ina ua matua talitonu le au Aposetolo, ma tagata ua talia le toetu manumalo mai o Iesu Keriso mai le oti ma le tuugamau. Ua latou molimauina foi vavega tetele ua faia e le au Aposetolo ona ua afio ifo le Agaga Paia ia i latou. Ua tele ai ina ofoina atu a latou mea totino ua tuufaatasi ma ua faasoa mo le manuia o le Ekalesia.

Peitai, e i ai tagata e vaivai pea, pe a oo ina tofotofoina e le agaga tau faasesē o le tiapolo. E pei la ona faasesēina ai le ulugalii lenei o Anania ma Safaira. O lo la manatu e le o iloa e Peteru ma le au Aposetolo, lo laua tuu ai le isi vaega o le tau o lo laua fanua, ae ave atu na o se vaega ia Peteru ma le Ekalesia. O le gaioga ua la olegia ai le Agaga Paia, o le olegia lava lea o le Atua.

Ua faateia Anania, ina ua fai atu Peteru, o le a le mea ua faatumu ai e Satani lou loto , e te pepelo ai i le Agaga Paia, ma e tuu ai ma oe nisi mea o le tau o le fanua? A o tumau e le'i faatauina, e le o lou lava ea? Ae ina ua faatauina le fanua, e le o lau ofo ea lea e tuuina mai ai le tau o le fanua mo le Ekalesia? O le agasala a Anania, e le ona ua ia tuua le vaega o le fanua mo laua, ae ina ua foliga mai o le tupe ua avatu i le Ekalesia, o le tau atoa lea o le fanua. O le pepelo lea ua faailoa atu i le Ekalesia, o le pepelo lava lea i le Atua le Agaga Paia. Ma na faafuasei ai ona ave ese o laua agaga ma feoti ai lava i lea itu aso.

O le matautia lea o le mana o le Agaga Paia ua latou molimauina, o le faailoga lava lea o le faavaeina o le Ekalesia a Iesu i le lalolagi, e le o se fuafuaga e tau ina faatauina. O le Ekalesia ua faavaeina e le Agaga Paia, o le aiga lea o le Atua i le lalolagi. O le Isaraelu fou lea a le Atua, e i ai i totonu tagata uma o le lalolagi ua talitonu ma faatuatua ia Iesu Keriso le Atua ua liutino tagata.

Ioe, le fanau, o le Atua e lelei i taimi uma. E le tatau ai ona tatou tofotofu ma olegia le Atua.

**GALUEGA FAATINO:**

Faamatala mai ni ou lava manatu le mafuaaga na feoti ai Anania ma lona toalua o Safaira.

**PESE:** Pese ma Viiga 122

**A’OA’OGA:**

1. Aua le tofotofo i le Atua.
2. O le Atua e lelei i taimi uma.
3. O le Agaga Paia, ua tatou mafuta faatasi i aso uma.

.....

**ASO SA:** 10 IULAI 2022

**MATAUPU:** E LĒ SOLA SE TAGATA MAI LE ATUA

**SINI:** Ia malamalama le vasega, e le sola se tagata mai le Atua, auā o Ia o le malamalama o le lalolagi na te faamalamalamaina tagata uma.

**TUSI FAITAU:** Salamo 139: 7 – 12

**FESOASONI MO FAIAOGA:**

O faailoga vaaia o le Tusi Paia, e na te faamatala mai le mea sili ona moni ma faamaoni mo le tagata ina ia i ai lona malamalama, ma lona iloa masani i lo la va mafuta ma le Atua. E le finagalo le Atua ina ia i ai se iloa maoa’e o le tagata i le Atua, ae pau lava le finagalo o le Atua, o le ola mafuta, o le ola tapuai, ma le ola usitai o le tagata. E le mafai foi ona iloa tino le moni (truth) ma

le faamaoni (honest) sei vagana lava ua pulea ma faatonu folauina le olaga o le tagata.

O mea ia fai mai le faisalamo i le Salamo 139 na te a’oa’oina le tagata ia iloa o le Atua o le (Omniscience) na te silafia mea uma, o le Atua (Omnipresence) e afio i mea uma, ma o le Atua (Omnipotence) o le Mana ma le malosi uma lava, o le Pule Aoa ma le Paia atoatoa.

Fai mai le Faisalamo, po o fea la ou te sola i ai, ma ou lafi lilo ai, e le natia lava le mea moni, e silafia e le Atua mea uma, e oo lava i o tatou tagata lafi lilo i le agasala. Ua pese ai ma le fiafia le Faisalamo i le Atua, auā o a lava ana amio leaga, ma lona ola agasala, e vaai atu lava i fofoga o le Atua, e ala i lona malamalama susulu mai mo ia, ona ia lagona ai lea o lona faatauva, ma lona leaga faia, ona ia foi atu ai lea i lona Atua, auā e na te matua sapaapaia o ia i aao o lona alofa tunoa.

O le feau o lo o momoli mai e le Faisalamo, e faapea ‘aua lava nei tatou manatu ifo o i tatou o tagata ua pauu atu i le agasala, ona i ai lea o lo tatou lagona, ua tuulafoa’iina i tatou e le Atua.

Ia teu i loto ma agaga, e leai ma se tagata na faia e le Atua, e fia silasila atu ona fofoga ua fano lona ola i le agasala. O le ala lea e taumulimuli mai ai lava le malamalama o lona alofa tunoa, ia faaolaina ona tagata i le lalolagi. O le faamaoniga o lenei mau, ua afio ifo le malamalama o le Atua i le lalolagi, o lona finagalo lava e lavea’i ona tagata mai le agasala. O Iesu Keriso lea, o le Atua ua liutino tagata ina ia le fano se tasi e faatuatua ia te Ia a ia maua e ia le ola faavavau.

O le tatou mataupu lena i lenei taeao, e leai se tagata e sola mai le Atua. Auā e finagalo le Atua, ina ia tatou maua lona olioli ma lona fiafia, ina ua faaolaina e ala ia Iesu Keriso i ona manuia faavavau.

**Uiga o Upu ma Fuitau:**

- i) Agaga - Agaga o le Atua, o le Agaga Paia
- ii) seoli - o le nofoaga o le oti
- iii) tuluiga - faasiusiuga

iv) Apaau o le taeao - sola faanatinati 'ese

### **GALUEGA FAATINO:**

Toe faamatala mai i au lava upu, faaupuga a le Faisalamo e faatatau i le mafai ona sola ese mai se tagata mai le Atua.

**PESE:** Sola ese, sola ese mai ia Satani

### **A'OA'OGA:**

1. E silafia e le Atua a tatou amio uma.
2. Ia saili le Atua e te manuia ai.
3. O le Atua o le malamalama o le lalolagi.

.....

**ASO SA:** 17 IULAI 2022

**MATAUPU:** O LE AMIOTONU A LE ATUA.

**SINI:** Ia malamalama le vasega, o le amiotonu a le Atua, tatou te molimauina i aso uma, auā e lelei, sa'o tonu ma faamaoni o Ia i aso uma e oo i le faavavau.

**TUSI FAITAU:** Mataio 17: 24 – 27

### **FESOASOANI MO FAIAOGA:**

O le mea muamua ia tatou iloa, o le amiotonu a le Atua, e tatou te molimauina i aso uma, e ala i lona alofa tunoa, e mai lava i le vavau e oo i le faavavau. O lona lua e le alo lava le Atua, i lona faia o le mea tatau, ina ia fai ma taiala i tagata uma le faatinoga o lana amiotonu.

O le vaega o le tusi a Mataio 17: 24 – 29, ua fai ma tatou mataupu. Ua fesiligia ai e le au ao lafoga o le malumalu Peteru. E le faia ea le lafoga o le malumalu e lo outou a'oa'o? Ua tali atu Peteru, e fai lava.

Ua ulufale Iesu ma ona so'o i le fale, ona mua'i fetalai atu lea o Ia ia Peteru, Simona e, pe ni a fa oe? E ao tiute po o lafoga mai ia te ai e tupu o le lalolagi? O a latou fanau ea, po o tagata ese? Ona fai mai lea o Peteru ia Iesu. O tagata ese. Ona fetalai atu ai lea o Iesu ia Peteru. O lea foi ua saoloto ai le fanau. O le uiga o lea saunoaga a Iesu, o Ia o le Alo o le Atua, e pei ona faamauina i le Luka 2: 49, ina ua saili atu e Iosefa ma Maria, ma maua Iesu i le malumalu, se a le mea lua te saili mai ai ia te au? Lua te le iloa ea e tatau ona ou i le fale o lou Tamā? O le malumalu lea.

O lafoga ua fuafuaina, e mo tagata uma o le malo o i lalo o le puleaga a le tupu, e totogi atu e ola ai o ia ma lana fanau, ae saoloto i latou mai le totogiina o le lafoga. E faapefea ona totogi e Iesu le lafoga o le malumalu, a o Ia o le Alo o le Atua e ona le malumalu? Peitai, ua le silasila Iesu i le faamalosi o le tulafono, a o le maualuga o le faatinoga o le loto fuatia ifo lelei. Ua Ia finagalo ai ia avea o Ia ma faataitaiga lelei i isi tagata, ia faataua e tagata uma o latou tiute mo le manuia o le malo i le tino nei. Ia aua lava nei tausua mai i lona le totogiina o le lafoga o le malumalu.

O lea na fetalai atu ai Iesu ia Peteru. Ina alu ia oe i le vai, ma lafo ai se matau, o le uluai i'a e te maua, ia e tago i ai, ma fafasi lona gutu ona e maua ai lea o le tupe siliva, ia e ave lea, ma avatu ia te i latou mo oe ma a'u. E le iloa pe na alu Peteru pe leai.

A i ai le talitonuga o le au popoto e suesue i le Tusi Paia, e le o le sa'o lea o le fetalaiaga a Iesu. Aua foi, e le faia lava e Iesu ni vavega mo sona lelei, ma lona manuia, pe fa'aalia sona silisili ese. O vavega uma ua Ia faia mo le manuia o tagata latou te manaomia le faaolaina. E pei ona Ia le liliuina ma'a e fai ma areto e faamalie ai lona fia ai, ae ua faalagolago ma faatuatua i le alofa tunoa o lona Tamā, e ola ai ma lavea'iina ai o Ia.

O le manatu o le au popoto i le sa’o o le fetalaiga a Iesu ia Peteru, e faapea, Alu ia oe i lau matau ma lafo i le vai, ona maua ai lea o i’a, ma alu atu ma faatu atu, ona maua lea o le tupe, e te avatu ia i latou mo oe ma a’u. O le manatu lea o le au fai mataupu silisili o le Tusi Paia, ou te manatu foi o le faataotoga lea e tala feagai i le saunoaga lea a Iesu.

Ioe, le fanau, o le amiotonu a le Atua e na te faia mea tonu, sa’o faamaoni, ma le alofa tunoa, ina ia taialaina ai lo tatou ola i mea uma tatou te faia. O le amiotonu lea, ua fa’aalia ia Iesu Keriso ua tatou faaolaina ai i Iona Soifua Paia. Ia manuia le Aso Sa.

### Uiga o Upu:

- i) tomua - amataga
- ii) saoloto - e le lavea pe aafia i lafoga
- iii) fafasi - faavā le gutu o le i’a

### GALUEGA FAATINO:

1. Vaelua le vasega i vaega e lua. Ona fa’aali manatu lea pe tatau ona totogi e Iesu le lafoga, pe lē tatau foi.

- i) O le isi vaega ia faailoa mai le lē tatau.
- ii) O le isi vaega ia faailoa mai e tatau

**PESE:** Pese ma Viiga 82 (Avatu i le tupu)

### A’OA’OGA:

1. Aua le aloalo ese i ou tiute e tatau ona fai.
2. Ia amio sa’o i taimi uma.
3. Ia fai i tatou ma faataitaiga lelei i isi tagata.

.....

**ASO SA:** 24 IULAI 2022

**MATAUPU:** SALAMŌ E FAAOLAINA AI

**SINI:** Ia malamalama le vasega o le salamō e faaolaina ai, o le auala lea tatou te taunuu ai i le ola faavavau.

**TUSI FAITAU:** Iona 4: 5 – 11

### FESOASOANI MO FAIAOGA:

O le tatou mataupu i lenei Aso Sa, le Iona 4: 5 – 11, ua faailoa mai ai e le Atua, Iona alofa faamagalō i tagata o le aai o Ninvea, ina ua latou salamō mai i latou agasala, semanu e faaumatia ai i latou i le toasa o le Atua. O le mea lea e taua ai le Atua o le alofa tunoa uma lava. E na te lei faailogaina se tagata. O ai lava ua salamo ma lagona le loto maulalo ma foi i le Atua, e na te tali sapaia o ia i ona aao, ma Ia le manatua ni leaga ma ni agasala, a o Iona alofa tunoa ia manuia ai ona tagata.

O Iona o le Perofeta mai le malo i matu o Isaraelu. Na faatonu e le Atua le Perofeta o Iona, e alu e ave le savali i le aai o Nineva, e toe fagafulu po ona faaumatia lea o Nineva, ona ua oo atu a latou agasala ma amio leaga i luma o le Atua. O le finagalo o le Atua, e tatau ona lapataia tagata Nineva, ae lei oo atu le toasa o le Atua.

O Nineva o le aai i totonu o le malo o Asuria. O Asuria na latou faatoilaloina Isaraelu i le vaitaimi o le 780BC – 760 BC. O le mafuaaga lea na alai ona sola le Perofeta o Iona, i Tasesa, ae le alu e faataunuu Iona valaauina. Auā ua iloa lelei lava e Iona, e taunuu atu loa lana savali ona salamo loa lea o tagata Nineva, ma liliu mai i le Atua, ona le faataunuuina loa lea o lo latou malaia, ona o le Atua o le alofa tunoa, ma le alofa faamagalō. O le tusi a Iona, e le o se tala ia Iona le Perofeta, o le tala lava i le alofa tunoa o le Atua, i ona tagata i le lalolagi. A ua taua le Perofeta o Iona, ona o uiga faaletagata, e le manao e faaolaina

isi ona o le fia taui masui. O le faamoemoe o Iona, ia oo lava le toasa o le Atua i tagata Nineva, ona o lo latou faatoilaloina o Isaraelu.

O le mataupu e 4 o le tusi a Iona, ua fai ma tatou lesona o lenei taeao, ua matua faailoa atu e le Atua ia Iona, le uiga moni o le alofa tunoa ma lana amiotonu i ona tagata i le lalolagi.

Ua uma ona taualaga Iona e talai atu le afioga a le Atua i tagata Nineva, ona ia sau ai lea i le itu sasae o le aai, ua na faia mo ia i lea mea le fale apitaga, ua nofo i ona lalo i le paolo, seia iloa e ia pe se a se mea e oo i le aai. Na saunia foi e le Atua le Kikaiona, ua na faasosolo i luga o Iona, e fai ma faapaologa i luga o lona ulu, ona fiafia ai lea, e lavea'i ia te ia ai lona loto tiga. Ona ia matua fiafia ai lea ona o le Kikaiona. Ua malama ae le taeao, ona saunia lea e le Atua o le anufe, ua atia foi e le anufe le Kikaiona, ona mago ai lea. Ua alu ae le la, ona saunia lea e le Atua o le matagi vevela mai sasae, ona ogotia ai lea o le ulu o Iona i le la ona vaivai ai lea o Iona. Ona ia faatoga lea i le Atua, e lelei ona ia oti, ae leaga ona ola.

O le feau o lo o momoli mai ia Iona e le Atua, o Ia lava le Atua o le paolo ma le malu o tagata ola uma. A oo ina le i ai faatasi le Atua ma ona tagata ona feagai loa lea ma puapuaga. O le Atua o le Kikaiona, e na te faapaolo ma fai ma malu o lana fanau i le lalolagi. O Nineva o le aai, o lo o i ai tagata ola na faia e le Atua. Ua silasila mai le Atua, ua faataugā e le agasala lo latou ola. Ona ia aumaia lea o le lapataiga ina ia salamō ma foi atu ia te Ia, ona faaolaina lea. Ua silasila mai le Atua, i le tupu ma tagata o Nineva, ua taoto i le ie talatala ma le efuefu ma le anapopogi ma le tatalo, ona mutimutivale ai lea o lona alofa tunoa, ma liliu ese lona toasa mai i tagata o Nineva.

Ua fetalai le Atua ia Iona, Ua lelei ea lou ita ona o le Kikaiona? Ua tali Iona, ou te ita tele lava, e oo lava i le oti. Ua toe fetalai le Atua ia Iona, E pei ona e fiafia i le Kikaiona i lona paolo na e malu ai i le vevela o le la, e le faapena ea ona ou alofa i le selau o afe ma afe e luafulu o tagata o Nineva, o e le iloa o latou lima taumatau po o latou lima tauagavale, ma manu vaefa e tele. Ua

ou olioli ina ua salamō i latou mai le agasala, ua ou tali sapaia i latou i lo'u alofa tunoa.

E leai se tagata e sili a'e i le isi tagata i le alofa tunoa o le Atua. O i latou uma ua salamo, ma foi mai ma le loto maulalo, ma naunau i le alofa, latou te mafuta faatasi ma le au paia uma i le Atua i le ola faavavau. O Iesu Keriso le tatou Faaola, ua afio mai i le lalolagi, ina ia tatou maua le salamō mai le agasala, a ia faaolaina i tatou i lona lava soifua.

### Uiga o Upu ma Fuaitau:

- i) fale apitaga - o le tamai fale e faapaolo ai.
- ii) Kikaiona - o le laau mafala, e lautetele ona lau e mafai ona faapaolo ai.
- iii) atia - aina, po o le aati
- iv) ogotia - velasia
- v) mamae - mago, pe

### GALUEGA FAATINO:

Tusi mai ni ou manatu, pe tatau le ita o Iona ina ua le taunuu le faaumatia o Nineva. E tasi lava le parakalafa e fa laina.

**PESE:** Pese ma Viiga 134

### A'OA'OGA:

1. O le salamō e fai i le olaga atoa.
2. E tutusa tagata uma i le alofa tunoa o le Atua.
3. Ia faalogo ma usitai i le Atua.

.....

**ASO SA:** 31 IULAI 2022

**MATAUPU:** O LE OLA I TALA ATU O LE OTI

**SINI:** Ia malamalama le vasega, o le ola i tala atu o le oti, o le toetu mai lava lea o tagata ua talia i le faatuatua Iesu Keriso ma salamō faamaoni mai agasala uma.

**TUSI FAITAU:** Mareko 12: 18 – 27

### **FESOASOANI MO FAIAOGA:**

Le vaega o le tusi a Mareko 12: 18 – 27, ua fai ma tatou mataupu i lenei Aso Sa, ua fesiligia ai e le au Satukaio Iesu, po o ai o le au uso e to’afitu e fai mo ia le ava e toatasi na faiava uma i ai, ae mulia’i ona oti le fafine, pe a oo i le toetu pe afai e i ai se toetu?

O le fesili a le au Satukaio, e le ona o le fia iloa le mea moni, a o le osofaiga o Iesu i lona silafia, ia le mau tali o Ia, ma tausui ai tagata ma ulagia ai, ma taofia ai Iesu mai i le faia o a’oa’oga fou. E le gata i lea, a o le fefefe o le au Satukaio e suia o latou olaga, mai le tulaga mauulaga ma le aloaia o lo o ola ai.

O le au Satukaio, o tagata sili ia ona mau tulaga i totonu o le fonofono a taitai o le lotu Iutaia, e taua o le au Saneterini, e i ai ma le au Faresaio ma le au Herotiana. O tulaga o ositaulaga sili e tele lava i le au Satukaio. O i latou ia e pulea le vaaiga o le malumalu, o tupe faasili e maua mai o lo o tamaoaiga ai i latou. Latou te le talitonu i le ola i tala atu o le oti, ma e le talitonu foi i le tala faasolopito ia Mose.

Ua silafia lelei e Iesu, le pogai o lo latou fesili. O le fesili i lo latou manatu, ia faamaina Iesu i luma o le motu o tagata. O le tali a Iesu, ua matua manino mai ai le uiga o le ola i tua atu o le oti. O le upu toetu (resurrection) po o le ola i tala atu o le oti o lona uiga, o le ola ina ua oti le tino. E le o faatatau i le Toetu

mamalu mai o Iesu mai le oti i le taeao o le Eseta, po o le toe tutu mai o le au faatuatua i le Aso o le Alii (Last Day)

E tatau i le tamaloa ona fai ava, ma fanau mai ni fanau. O le tulafono lea a le au Iutaia (Teuterenome 25: 5) ina ia iai le faasinomaga i fanua, ma faatumauina lona igoa. O le mafuaaga lea e le talitonu ai tagata Iutaia i le ola i tala atu o le oti.

O le mea lea ua outou sese ai, ina ua outou le iloa upu o Tusi, ma le Mana o le Atua. E tatau ona outou faitau i ai ma malamalamaina. Aua pe a toe tutu mai nai e ua oti, latou te le fai avā, pe nofo tane, ae peitai latou te pei o agelu o i le lagi.

O le Mana ma le pule aoao lea a le Atua, ua tatou talitonu i ai. O le ola i tala atu o le oti, e le o se mea lea a i tatou, a o lo tatou natura lea. O lona uiga o le ola i tala atu o le oti, o le ola fou e ese mai i le ola o lo o tatou ola ai. E le toe i ai se vaeveaga o tane ma fafine. O tane ma fafine ua latou iloa le manaia o le fai toalua, latou te fefefe i le oo mai o le oti, auā latou te le toe fai ava ma nofo tane.

Ua le mafai ona faamalamalama mai i lenei mataupu, foliga o le ola i tala atu o le oti. Peitai, o le finagalo o le Atua mo i tatou, ina ia tatou talitonu atoatoa ma le faatuatua na te faia mo i tatou mea silisili ona matagofie ma maua ai le olioli moni faavavau.

Ia tatou fiafia laia e tapua’i ma usitai ma faalogo i afioga a le Atua, aua ua Ia saunia le ola fou i tala atu o le oti mo i tatou.

### **Uiga o Upu:**

- |      |        |   |                           |
|------|--------|---|---------------------------|
| i)   | gafa   | - | o e fananau mai i se aiga |
| ii)  | faapei | - | foliga tutusa             |
| iii) | toetu  | - | ola i tala atu o le oti   |

**PESE:** Pese ma Viiga 51

### **A’OA’OGA:**

1. Ia tatou iloa e i ai le ola i tala atu o le oti.
2. E le tutusa lo tatou ola i le taimi nei ma le toetu.



3. E leai se fai ava ma nofo tane i le ola i tala atu o le oti.

.....

**MANATU AOA O AOKUSO:**

**VAAI MAMAO I LE LUMANAI MA OLA  
TAPENAPENA I AI**

O le manatu taiala o Aokuso, ia iloa ma a'oa'oina tamaiti, ia vaai mamao mo le lumanai, ma ola tapenapena i ai, aua ua le toe faigofie nei aso. Ua tele a'afiaga o lo tatou lalolagi i suiga ogaoga o le tau, o le mau faama'i oti ua fano ai le ola o tagata, aemaise le oo mai o le poto fou faatekonolosi, ua a'afia ai olaga o tagata i aso fai so'o.

**ASO SA: 7 AOKUSO 2022**

**MATAUPU: UA FAAOLAINA ONA O LE VAAI  
MAMAO**

**SINI:** Ia malamalama le vasega, ua faaolaina ona o le vai mamao, auā na saunia lelei ma lava tapena, e faafetaia'i faafitauli e tutupu mai, ma faaolaina ai.

**TUSI FAITAU:** Kenese 41: 52 – 57

**FESOASOANI MO FAIAOGA:**

O le tusi faitau, ua fai ma tatou lesona o lenei Aso Sa, o le taunuuga lea o le valaauina o Iosefa e le Atua e ala i ana miti. Na afua ai ona agaleagaina o ia e ona uso, ma tuua lona aiga, ae ola ai i Aikupito. Na nofo ai o ia iā Potifara le taitaiu a Farao, ae na agaleagaina ai foi e le toalua o Potifara ma faafalepuipuiina ai. Peitai, na lavea'iina o ia e le Atua, ina ua ia faamatala le uiga o miti a Farao.

O lea la ua taunuu miti a Farao, e pei o le fa'aaliga na ia iloa, o le a oo mai le oge tele i le lalolagi. O le a naumati ma mativa le laueleele, o le a utiuti mea ai o le a maua.

Ua mavae atu le fitu tausaga, na tele ma faula'i ai le saito i totonu o Aikupito. A o Iosefa, ua tofia e Farao, e fai ma palemia ua ia faia le fuafuaga poto, ina ia poloa'i Farao i tagata Aikupito, latou te ava'e le lona lima o fua o fanua i tausaga mau e fitu, ma ia teua saito i le pule a Farao. E fai foi lea ma mea e ai ma mea e teu ma le nuu i tausaga e fitu o le oge e i ai i le nuu o Aikupito. O le vaai mamao lea a Iosefa, ua faafofoga i ai Farao. Ua lelei lea ia Farao.

Ua mavae le fitu tausaga mau na i ai i le nuu o Aikupito, ona oo mai ai lea o tausaga e fitu o le oge, e pei ona faailoa mai e Iosefa. Ua le na o Aikupito ua i ai le oge, a o nuu uma. Peitai, ua na o Aikupito ua maua ai le saito ma le mea ai, a o nuu uma ua i ai le oge. Ua velavela le oge, ua matelaina foi tagata uma o Aikupito, ona latou alalaga ai lea ia Farao. Ua tali atu Farao, ia latou o atu ia Iosefa. O le mea e fai mai o ia, o le mea lena latou te faia. Ona talai ai lea e Iosefa o mea uma na faaputuina ai le saito, ma na faatau atu i tagata Aikupito.

Ua matelaina tagata o nuu uma i le fia aai, a e ua na o Aikupito o lo o maua ai le saito. Ua faalogo Iakopo, o lo o i ai le saito i Aikupito, ua na fai atu foi i ona atalii. Ua ou faalogo e i ai saito i Aikupito, ia outou o ifo i ai, ma faatau mai ai ma tatou, ina ia tatou ola ai, ae aua le oti. Ua faapena foi nuu uma lava, aua ua tau fai o atu uma i Aikupito e faatau mai ai le saito mo mea ai, ona o le oge ua velavela.

Ioe, o le vaai mamao lea a Iosefa na maua mai i le Atua, e ala i fa'aaliga na iloa e Iosefa i ana miti, ma fa'aaliga na iloa e Farao le tupu o Aikupito. O le vaai mamao ua faaolaina ai tagata uma o le lalolagi i ia ona taimi i le taimi oge i meaai. Na taua ai Iosefa o le faaola i lea taimi o le gasologa mai o le lalolagi.

Peitai, o le silasila a le Atua e ala i lona Alo pele e toatasi o Iesu Keriso, na afio mai i le lalolagi ma faaolaina tatou tagata mai le agasala i lona soifua ua sasa'a atoa mai, ina ia saofaga i tatou uma i lona malo faavavau.

## Uiga o Upu:

- i) mau - tele le meaai
- ii) oge - leai ni mea e ai
- iii) matelaina - o le a fano i le fia ai
- iv) talai - tatala
- v) velavela - ua faasolo ina leai se mea e maua.

## GALUEGA FAATINO:

Faamatala mai ni au fuafuaga faavaai mamao e lavea'iina oe ma lou aiga i se oge e tupu mai.

**PESE:** Pese ma Viiga 115

## A'OA'OGA:

1. Ia ola tapena i le taimi nei.
2. Ia lelei lau vaai mamao.
3. O le Agaga o le Atua, e manino ai le lumanai.

.....

**ASO SA:** 14 AOKUSO 2022

**MATAUPU:** UA FAASOA E LE TAMĀ MANUIA I LE ATALII

**SINI:** Ia malamalama le vasega, ua faasoa e le tamā manuia i le atalii, o le tauai lea o le atalii e faalogo ma usitai i le a'oa'o atu a le tamā.

**TUSI FAITAU:** 2 Samuelu 19: 31 – 40

## FESOASOANI MO FAIAOGA:

O le tatou tusi faitau i lenei Aso Sa, o le tala ia Pasili le toeaina matua e nofo i Kiliata. O ia foi na ia avatua moega, ma ipu, ma ipu omea ma saito ma mea e 'ai e tele ua lava ai, le tupu o Tavita ma Isaraelu sa ia te ia, ina ua fia aai, auā ua foua e Apisaloma le nofoaiga tupu a lona tamā.

Ua oo i le taimi na toe foi ai le tupu o Tavita i lona maota i Ierusalem, ina ua fasiotia Apisaloma, na faafeaoina e le toeaina o Pasili le tupu i le tuaoi o le Ioritana, ma sosi faamavae atu ai ia Tavita. Na tauanauina ai e le tupu o Tavita, le toeaina o Pasili, ina ia la o ma ia e nofo i le maota o le tupu, sei ona tauai atu ia te ia lona agalelei ma lona faaeaea ia te ia le tupu o Isaraelu. Peitai, ua tali atu Pasili, E fia ni aso o tausaga o lou olaga o totoe, ta te o a'e ai ma oe le tupu i Ierusalem? Ua valugafulu o'u tausaga i lenei aso, e iloa ea e a'u se lelei ma se leaga? E lagona ea e lau auauna nei ni a'u mea e ai ma ni a'u mea inu? Ou te toe lagona ea le leo o tane pepese ma fafine pepese? Se a le mea e toe faatiga e lou alii le tupu o lau auauna? E momoli faaitiiti atu e lau auauna i le tupu i Ioritana, se a foi le mea e tauai mai ai e le tupu i lona tauai tele? Sei toe foi lau auauna, sei ou oti i lo'u nuu e latalata ane i le tuugmau o lo'u tamā ma lo'u tinā. Silasila foi i lau auauna o Kimeama o lo'u atalii, e alu atu o ia ma lou alii le tupu, e te faia ia te ia se mea e te finagalo ai.

Ona fai atu lea o Tavita le tupu, ma te o lava ma Kimeama, ou te faia foi ia te ia se mea e te loto i ai, o mea uma foi e te fai mai ai ia te au ou te faia lava mo oe. Ona sosi atu lea o le toeaina o Pasili e faamavae i le tupu, ona toe foi ai lea i lona laueleele i Kiliata.

Ia manatua foi tamaiti, i Isaraelu, a valaaulia e le tupu se tagata la te mafuta ma ia i lona maota ma lona lotoa, ua tusa lea tagata o se atalii o le tupu. O tu ma aga e fai i le fanau a le tupu e faapena foi le faiga ua fai ai Kimeama le atalii o Pasili. O faamanuiaga nei ua maua e Kimeama le atalii o le toeaina o Pasili, ona o lana tautua ma lana faaeaea i le tupu o Tavita.

A o faamanuiaga uma nei e maua e le atalii e faalogo ma usitai, i le a’oa’o atu ma le a’oai atu a le tamā. E tausi ma alofa faamaoni i le tamā, o lona taunuuga e maua le manuia mai le Atua.

O Iesu Keriso, na faalogo ma usitai i le Atua lona Tamā, na afua ai ona ausia lo tatou faaolataga. O lona tau, ua avatu i ai le suafa e silisili i suafa uma lava, ma le pule aoao i le lagi ma le lalolagi.

### **Uiga o Upu ma Fuaitau:**

- i) alii tele - o le tagata tamaoiga
- ii) faatiga - faatele mea
- iii) sopoia - ua asa i le vai.

### **GALUEGA FAATINO:**

Lisi mai ni amio e lima e te ola ai, ina ia e maua manuia e faasoa mai e lou tamā.

1. Faalogo ma usitai i a’oaiga ma le a’oa’o atu a le tamā.
2. Ia e ava i le tamā.
3. Ia tausi faamaoni ma alofa i lou tamā.
4. Ia e solisoli mulivae i faatinoga a tama.
5. Aua e te ma i lou tamā, pe a ma’i ma matua.

**PESE:** Pese ma Viiga 138

### **A’OA’OGA:**

1. E te manuia i totonu o lou aiga.
2. Ia e alofa faamaoni ia tamā.
3. Ia e tauave le igoa lelei o tamā.

.....

**ASO SA: 21 AOKUSO 2022**

**MATAUPU: AVE LE OLA MO LE ALII**

**SINI:** Ia malamalama le vasega, o le ave o le ola mo le Alii, o lou faalogo lava lea ma e usitai i ana afioga, ma ana tulafono ma ana faamasinoga ma e ola ai i aso uma.

**TUSI FAITAU:** Mareko 8: 34 – 38

### **FESOASOANI MO FAIAOGA:**

O le tatou mataupu i lenei Aso Sa; Ia ave le ola mo le Alii, o le Mareko 8: 34 – 38; Ua fetalai atu ai Iesu i lona au so’o ma le motu o tagata, ai se fia mulimuli mai ia te A’u, ia faafiti o ia ia te ia, ma ave e ia lona satauro, ile mulimuli mai ai ia te A’u. Aua ai se fia faasaogalemuina lona ola, e maumau ai ia te ia, a o le faamaumau lona ola ona o a’u ma le tala lelei e faasaoina e ia. Ua latalata mai puapuaga o Iesu, ona ia fetalai atu lea i lona au so’o ma le motu o tagata i lenei fetalai, ina ia latou malamalama, o le faalogo ma usitai i afioga ma tulafono ma faamasinoga a le Atua, ma ola ai i aso uma, e le saogalemu lea i le lalolagi o lo o ola ai. O le uiga o le amoina o lou satauro, o tuinanauga ma amio a le lalolagi, i e faatautauina i lou satauro ma e amoina. E faapena le sauni atu o Iesu i le faataunuuina o lo tatou faaolataga. O le ola faalialia vale, o le saili o sona viiga ma le mamalu, o le ola tau ma sui, ma le ola faamaualuga, o tuinanauga ia o le lalolagi na faatautau e Iesu i lona satauro ma ia amoina, ua faaolaina ai i tatou.

E faapei ona faia e Iesu lenei auala, o lona finagalo foi lea mo i tatou. O lona valaau lea i lona au so’o ma le motu o tagata, ma i tatou foi, o lo o ola ma faalogo i le Tala Lelei, ina ia mafai ona faasaoina o tatou agaga i le ola faavavau. O le mea la e sili ona faigofie mo i tatou, ia matuā tatou saili le poto o le Atua.

O le poto o le Atua, o le tatou faalogo ma usitai i a'oa'oga ma tulafono ma faamasinoga a le Atua ma tatou ola ai i aso uma, o le ola lava lea ua ave mo le Alii. Auā afai e faatumuina le loto ma le agaga o le tagata i le Agaga o le Atua, ma maua ai lona poto, e matuā leai se avanoa o le alii o le lalolagi na te faaleagaina ai tagata o le Atua. Ia teu loto ia i tatou lenei a'oa'oga a Iesu, o se fia faasaoina lona ola ona o tuinanauga o le lalolagi, e maumau ia te ia. A o le tagata e faalogo ma usitai i a'oa'oga ma tulafono ma faamasinoga a le Atua, ma ola ai i le olaga atoa, o le tagata lena ua ia amoina lona satauro ma fai Iesu ma ogatotonu o lona ola.

Le fanau, ia ave le ola mo le Alii, e mautinoa lava lou saofaga i le ola faavavau. Lafoa'i tuinanauga o le lalolagi, ae amo lou satauro ma mulimuli ia Iesu.

### Uiga o Upu;

- i) faafiti - tete'e
- ii) maumau - fa'aalu, lafoa'i
- iii) togiola - faasao ma faamagalalo.

### GALUEGA FAATINO:

1. Faamatala mai le uiga o le fetalaiga a Iesu. “Ai se fia mulimuli mai ia te au, ia faafiti o ia ia te ia, ma ave e ia lona satauro, i le mulimuli mai ai ia te au.”

**PESE:** Pese ma Viiga 157

### A'OA'OGA:

1. Lafoa'i tuinanauga o le lalolagi.
2. Ia amo lou satauro.
3. Ia ave le ola mo le Alii.

.....

**ASO SA:** 28 AOKUSO 2022

**MATAUPU:** UA LOTO MALIE UA VAAI I LE FAAOLATAGA

**SINI:** Ia malamalama le vasega, ua loto malie ina ua vaai le faaolataga, auā ua iloa e mata le pepe o Iesu, o le faaolataga a le Atua i le lalolagi.

**TUSI FAITAU:** Luka 2: 25 - 35

### FESOASOANI MO FAIAOGA:

O le tusi faitau ua fai ma tatou lesona i lenei Aso Sa, ua vaai tino ma sapaapaia i lima o le toeaina o Simeona le faaolataga a le Atua i le lalolagi.

O le toeaina o Simeona o le tagata amioatua, e nofo i Ierusalem. Na ia iloa le fa'aaliga, e ala i le Agaga Paia, e le oo ia te ia le oti, sei ona vaai i le faaolataga.

Ua oo i le aso e tatau ai ona momoli Iesu i le malumalu i Ierusalem, e tusa ai ma le tulafono a Israelu, ona faailoa lea e le Agaga Paia ia Simeona, ona alu ai lea i le malumalu. Ua aumai e matua o le tama o Iesu, ia la faia ia te ia faapei ona tatau i le tulafono, ona sapai lea e ia i ona lima, ua vivii atu i le Atua, ua faapea atu, Le Alii e, e te tuuina atu nei lau auauna, ia alu ma le manuia, e pei o lau afioga, auā ua iloa e ou mata lau faaolataga, ua e saunia i luma o nuu uma lava, o le malamalama e faamalamalama ai nuu ese, ma le mamalu o Israelu.

Ua faateia Iosefa ma Maria ma ua taufaifofo i upu a le toeaina o Simeona, e faatatau i le tama o Iesu. Pe faapea ona iloa e lenei tagata lenei mea ia Iesu, ae fou i le vaai o ia. Ua ia toe fai mai foi, Faauta, ua tuu le tama nei e pauu ai ma toe tutu ai tagata e toatele o Israelu. O lona uiga o lea faamatalaga, o le faamasinoga amiotonu o le Tamā o le Faaolataga, e fano ai le au amioleaga, ma faaolaina ai tagata e toatele, o lo o vavalalo foi le

toeaina o Simeona, ia Maria e tuia lona loto ona o puapuaga e oo i ai le tama o Iesu mo le faaolataga o le lalolagi o tagata agasala. O le tagata lava e fiafia i le ola tapuai i le Atua, auā o le ala lea e tasi e mafanafana ai le mafutaga ma le Atua, e faapena ona faailoa mai ia te ia, mea lilo o i lona finagalo ma faatalitali i ai ma le fifilemu. A oo ina faataunuaina, ona maua lea o le loto malie. O le mea foi lea e tatau ona oo uma ia te i tatou, auā ua tatou vaai i mata o le faatuatua i le faaolataga a le Atua, ma ua tatau ona tatou maua le loto malie. Auā ua afio mai Iesu i le lalolagi ua puapuagaina ma faasatauroina, ua tanumia i le tuugamau, peitai, ua toe tu manumalo mai le oti, ua tatou maua ai le ola atali faavavau. O le mea lea e tatau ai ona tatou maua le loto malie auā ua toe soifua mai Iesu, ua afio atu i le lagi, e faatali mai ai i tatou.

### **Uiga o Upu ma Fuaitau:**

- i) e pauu ai ma toe tutu - e fano ma toe faaolaina
- ii) tuia - tiga

### **GALUEGA FAATINO:**

- 1. AIGA            2. LOTU            3. TAALOGA

Filifili i nofoaga e tolu i luga, le mea e maua ai lou loto malie. Faamatala mai le mafuaaga ua e filifili ai lea nofoaga.

**PESE:**            Pese ma Viiga 34

### **A’OA’OGA:**

- 1. Saili Iesu e maua ai le loto malie.
- 2. Ola tapua’i i le Atua, e fa’aalia mai ai mea lilo.

.....

### **MANATU TAIALA O SETEMA:**

#### **A AU LE ATUA MA I TATOU, O AI SE FAASAGA TAU MAI**

E le tuu fesiligia le tele o luitau malolosi o le ola ua tatou feagai i lenei vaitau. E le gata i le va o matua ma fanau, totonu o aiga ae faapea foi le Ekalesia ma le malo. O le upu a le fai-Salamo. “O le Alii o lou malu ia ma lou olo” Tatou te lagona le vaivai ma le lē mautonu, ae afai e moni lo tatou tumau i le Atua, ona lē fuatia lea o lo tatou ola i mea e tutupu mai.

**ASO SA:**                            **4 SETEMA 2022**

**MATAUPU:**                    **O LE TUSI I LE EKALEZIA I EFESO**  
*(The letter to the church in Ephesus)*

**SINI:**                                Ia malamalama le fanau i le mafuaaga na tusi ai le Aposetolo i le Ekalesia i Efeso.

**TUSI FAITAU:**                Fa’aaliga 2: 1 - 7

### **FESOASOANI MO FAIAOGA:**

E tele mea sa lauiloa ma tautau ai Efeso i na ona po.

- 1) Sa avea le uafu o Efeso e taulai uma ai fefaatauaiga i Asia Itititi, ua faaigoaina ai o le ‘Maketi i Asia.’(The market of Asia). O le mafuaaga lea sa tamaoiga tele ai Efeso ma avea ai o le nofoaga o le kovana o le malo o Roma i Asia.
- 2) Sa saoloto Efeso mai faiga faapolokiki a le malo o Roma. E faatino lava e Efeso ana fuafuaga faalemalo, e le aiaina e le malo tele o Roma. E mafua lea tulaga, ona o le tautua ma le tamaoiga sa foai e Efeso mo le malo o Roma.

- 3) O Efeso o le ogatotonu o le tapuaiga faa Aramatisi (Artemis) sa faatuina ai le malumalu, sa avea ma se tasi o mataaga iloga i le lalolagi. Sa faaigoaina ai lea malumalu o le ‘Diana i Efeso.’
- 4) Sa tautaua foi Efeso, ona o vai faataulaitu. O ‘tapui’ po o vai e fofo ai ma’i o tamaiti ma fananau ai fafine e leai ni fanau. Sa iloga ona saili fofo mai ai tagata o le lalolagi ma faateleina ai pea le tamaoaiga o Efeso.

E oo foi la i le tusi i le Ekalesia i Efeso, o lo o faaeaea ai le Apsetolo i le Ekalesia i ana galuega. Ua silafia e le Alii mea uma. *“Ua ou iloa au galuega, ma lou tiga ma lou onosai.”*

E foliga mai ua tauleleia Efeso i lana tautua i le Alii. Ua latou le taliaina Aposetolo pepelo ma a latou talaiga. O faigata ma tiga ona o le Talalelei, ua mafai e Efeso ona lavatia ua tumau i le onosai. E lei faavaivai lava Efeso ona o le Alii. *“Ua e tautiga ona o lou igoa”* Ua iloa e le Alii lo latou tumau ia te ia. Ae o le mea ua lē fiafia ai le Alii, ua avea le tamaoaiga tele ma le lauiloa o Efeso i le lalolagi, ua latou tuua ai lo latou uluai alofa. *“A ua ou lē fiafia ia te oe, ona ua e tuua lou uluai alofa.”*

Ua silafia lelei e le Alii, tagata Efeso ma a latou galuega. E ui ina faapea ua mafai ona latou onosai ua tumau i le Talalelei ia Iesu Keriso. Ae ua iloa foi ia latou galuega, ua leai se naunautai i le uluai alofa. O le uluai alofa, na siitia ia i latou i le ola fiafia ma le galulue faatasi mo le Alii.

E foliga mai ua galue lava le tagata mo lona tamaoaiga ma lona lava tauleleia, ae ua le faia mo le Alii. Ia galue ma le atoatoa mo le Alii. Ia foai ma le loto atu i le Alii. E le faatusalia mea ua faia e le tagata, ma sauniga lelei ua faia e le Alii mo ia i aso uma o lona ola.

O le mafuaaga lea o le tusi i le agelu i le Ekalesia i Efeso. Ia toe manatua e Efeso lona uluai alofa. Ia galue e pei ona uluai galue ai i le Alii, ma le loto naunautai. Auā o le tuugamoli, o lo o uu i aao o le Alii. O lona uiga, o Efeso, o le tuugamoli o lo o uu e le Alii, e pule le Alii i le Ekalesia. O le tusi atu la i le Ekalesia i

Efeso. *“Ia salamō ma toe foi i lona uluai alofa, o Iesu Keriso lea.”*

### **GALUEGA FAATINO:** Fesili ma Tali

1. O fea e tu ai Efeso?  
Tali: Asia Itiiti
2. O le a le igoa ua faaigoaina ai Asia Itiiti i le taimi nei?  
Tali: Turkey
3. O a mea e 4 sa lauiloa ai Efeso?  
Tali: i) Uafu – ogatotonu e fefaatauaiga i Asia Itiiti  
ii) Saoloto mai i faiga faapolokiki a Roma  
iii) Malumalu ‘Diana i Efeso’ Mataaga i le lalolagi  
iv) Vailaau – faataulaitu
4. O le a le uiga o le igoa Efeso?  
Tali: ‘O le atua tinā’ (mother Goddess)
5. O a galuega lelei na silafia e le Alii i Efeso?  
Tali: Onosai ma le tumau i le Talalelei.

**PESE:** Faalogo ma Usitai (pese Aoga Aso Sa)

### **A’OA’OGA:**

1. O Iesu Keriso o le uluai alofa lea.
2. Galuega ma le loto naunautai i le Alii
3. Aua le naunau tele i le tamaoaiga.

.....

**ASO SA:** 11 SETEMA 2022

**MATAUPU:** **UA FASIOTIA ULUMATUA O AIKUPITO** (*Death of Egypt's Firstborn*)

**SINI:** Ia malamalama le fanau, afai e lē au le Atua i manatu ma lagona o le tagata, e lē iu lelei lona ola.

**TUSI FAITAU:** Esoto 12: 29 – 36

### **FESOASOANI MO FAIAOGA:**

O ai ea e mafai ona finau ma le malosi o le Atua? O fesili ia, e tutupu mai pea, a fua i mea na faia e Farao i le nuu o le Atua, ma lona finauvale i le Alii. Ua avea le maaa o lona loto, ma mafuaaga ua oo ai le malaia i lona nuu. Ua manatu ifo Farao, o ia o le atua, ae ua galo ai, e pule le Alii i lona ola.

E ui o le tala leni na faatuina ai le uluai paseka ina ua faasaoina mai Israelu i le saua o Aikupito. Ae o se tala na iloa ai auega na oo ia Farao ma lona nuu, ma ua pau ai le mamafa o le toasa o le Atua i ulumatua uma o Aikupito, tagata atoa ma manu.

Ua maea ona faatino e toeaiina o le nuu o Israelu le poloaiga na poloai ai Mose ia faia. O le valiina lea o faitotoa o fale i le toto o le tamai mamoe. O le faailoga o le faaolataga. Ua oo i le itu lua o po ma ao, ona taia ai lea e le Alii ulumatua uma o Aikupito, o tagata atoa ma manu. E leai lava se aiga o Aikupito e lei lagona ai le leo o auega. E oo lava i le atalii o Farao, o le e sosoo i le nofoalii, ua fasiotia foi o ia.

Ona aami lea e Farao, o Mose ma Arona. Ua faatonu e le tupu i laua, e o ese loa ma le nuu o Aikupito. Ia avea uma mea ua ia te i latou. O le tamaoiga uma sa latou maua ao nonofo ai i Aikupito ia o ma ave uma. Ua lagona le fefe ma le popole o Farao. E oo lava i le nuu atoa o Aikupito, ua latou iloa, “E leai lava se Atua, e sili atu lona malosi, nai lo o le Atua o Israelu.”

O mea uma ua maua e le tagata e a le Atua lea, e oo lava i le fanau. Aua nei finau vale le tagata i le finagalo o le Atua. O le Atua e pule i mea uma o i le lagi ma le lalolagi. O le finau vale i le Atua, e tua ma iu lava i tigā ma puapuaga.

### **GALUEGA FAATINO:**

1) Faatumu le Parakalafa

Faatumu mai le parakala i upu nei:- tulua, Aikupito, Farao, tietie, nfoalii, ulumatua, fasi, faatagaotauaina, manu.

“Ua oo i le \_\_\_1\_\_\_ o po ma ao ona \_\_\_2\_\_\_ ai lea e le Alii o \_\_\_3\_\_\_ uma lava i le nuu o \_\_\_4\_\_\_, o le ulumatua a \_\_\_5\_\_\_ o le \_\_\_6\_\_\_ i le \_\_\_7\_\_\_, atoa ma le \_\_\_8\_\_\_ a le ua \_\_\_9\_\_\_ i le fale puipu, atoa uma ma \_\_\_10\_\_\_ a \_\_\_11\_\_\_.

2) Faaliliuina (Translation)

A maea ona faatumu parakarafa, ona faaliliu (translate) lea i le gagana Peretania.

- Faamolemole susuga i faiaoga, e le fa’aaogaina le Tusi Paia

**PESE:** 18 (Pese ma Viiga)

### **A’OA’OGA:**

1. Aua le finauvale i matua.
2. E auala mai le finagalo o le Atua i matua mo fanau.
3. E iuvale le faamaualuga.

.....

**ASO SA:** 18 SETEMA 2022

**MATAUPU:** O LE LOTO MAUALALO O KERISO  
(*The Humility of Christ*)

**SINI:** Ia a’oa’oina ma malamalama le fanau, e lei faamaualuga Iesu i lona itu Atua, ae na ia faia le faaolataga ma le loto faamaualalo.

**TUSI FAITAU:** Filipi 2: 1 – 11

**FESOASOANI MO FAIAOGA:**

“Auauna ma le loto maualalo”

O le tasi lenei o manatu autu taua o le tusi lenei a le Aposetolo i le Ekalesia i Filipi. Ia auauna ma le loto maualalo, e mafai ai ona ola faatasi ia Keriso. Ia iloa ona fefaamafanafanaai ma faamalosi au le tasi i le isi. Aua nei faamaualuga se tasi i ona manatu ma lagona.

O le tusi lenei o Filipi, na tusia ao i ai Paulo i le falepuipui i Roma. E ui ina i ai le Aposetolo i ona faigata i Roma, ae na naunau lava sei momoli ona alofaaga ma lana faamalosi i le Ekalesia. E ui ina manatu Paulo, ua ola lelei le Ekalesia e ala i le Tala Lelei ia Iesu Keriso, ae ua amata foi ona fevaevaeai manatu ma lagona o tagata. Ua finauvale, ola mimita, manatu faapito ma vaai maualalo. O le tusi foi lenei, na toe faamanatu ai e Paulo i le Ekalesia, le uiga moni o Keriso ma lona finagalo i lana galuega. “Ia ia te outou foi lenei manatu.” E lei manatu ifo lava Keriso o Ia o le Atua, ae na avea o ia ma pologa. Na faamaualalo e ia ia te ia, ona o le alofa.

E lei finau vale, pe mimita Keriso, ona o lona tulaga Atua. Ae na finagalo ia ola faatasi ma le tagata. Na auauna o ia ma le loto maualalo, ina ia iloa e le tagata le faamaoni o mea uma na ia faia mo le tagata. O le faamaoni, na oo lava ina maliu ai Keriso i le satauro.

A o lona maliu, lea na faaeaina ai o ia e lona Tamā. E faaeaina faatasi foi le Ekalesia, pe afai e loto e tasi, ma tutu fatasi ma le loto faamaualalo. “O lalo lava e maua ai malo.” Aua le avea le potu ma le atamai o le tamaitiiti e faamaualuga ai lona loto. Aua foi le avea le tele o mea e maua, e vaai maualalo i ai le isi tamaiti.

“Ia savavali faatasi ma le Alii ma le loto faamaualalo.”

**GALUEGA FAATINO:**

Faamatala mai le uiga o faaupuga nei:-

1) “Faamafanafana ia Keriso.”

Tali: Ua faamagaloina le tagata agasala ona o Iesu Keriso.

2) “Faamatala i le Alofa”

Tali: Ia faasilisili i le loto le alofa.

3) Finau vale.

Tali: E le sao se mea sese.

4) “Mitamita fua”

Tali: Aua le ola mimita i mea na faia e Keriso.

5) “Ua faamaualalo o ia ia te ia”

Tali: Ua ola faatasi Keriso mo le tagata agasala.

6) “O lē sa uiga faatasi ma le Atua”

Tali: O Iesu lava o le Atua.

7) “A ua sasaa atu o ia e ia lava”

Tali: Ua ofo atoa atu le soifua o Iesu Keriso mo le tagata.

8) “Ia ia te outou foi lenei manatu o ia Keriso Iesu”

Tali: Ia ola e pei o Iesu Keriso.

**PESE:** O le alofa o le Atua e ofoofogia..



## **A’OA’OGA:**

1. Aua le ola mimita.
2. O lalo e maua ai malo.
3. E finagalo Iesu i le loto faamaualalo.

.....

**ASO SA: 25 SETEMA 2022**

**MATAUPU: O LE FAAILOGA TAGATA**  
*(Favourism)*

**SINI:** Ia a’oa’oina ma malamalama tamaiti, e le o se mea lelei le faailoga tagata. O le tagata mativa ua foaiina i ai e le Alii le faatuatua e ola ai.

**TUSI FAITAU:** Iakopo 2: 1 – 7

## **FESOASOANI MO FAIAOGA:**

“O le tagata mauoa ma le tagata mativa” O se tasi lenei o manatu autu taua, o lo o faamamafa ai tusitusiga a le Aposetolo o Iakopo. O Iakopo o le uso o Ioane lea sa fa’aaunua i le motu o Patamo. O ia foi o le uso o Iesu. E i ai le manatu o Iakopo sa avea ma taitai o le lotu i Ierusalem.

O le mea lea o lo o agai lava tusitusiga a le Aposetolo, i tagata Iutaia o e o lo o salalau i le lalolagi, ma totonu lava o Ierusalem. “Ou uso e,” – O le fa’aaogaina ai e le Aposetolo, o lenei faaupuga, ua ia faailoa atu ai i e ua talitonu ma avea ma Kerisiano, e i ai le mea e ao ona fai se suiga. E ui ina ua amata ona faatupulaia le lotu, i nuu ese faapea Roma ma totonu foi o Ierusalem ae ua faatupulaia ai foi ma le va o le tagata mauoa, ma tagata matitiva.

“Ou uso e, ‘aua tou te faailoga tagata, i lo outou taofi i le faatuatua.”

O le uiga o lea fetalaiga, e leai se aoga o le faatuatua, ae manatu maualalo i le tagata mativa. E le faapea o le tele o le tamaoiga, o le tele foi lea ole faatuatua. Aua nei tau faatauvaaina e le tagata tauoloa le tagata mativa. O le faailoga tagata (prejudice) le amanaia (snobbery), le fa’aaloalo (disrespect). Ia taumamao ma ia uiga fa’aalia. Afai e tumau pea i lea tulaga, ua latou vaai maualalo foi i le Alii (they dishonor the Lord).

O le tagata mativa, ua filifilia e le Atua i le faatuatua. “E le ua filifilia ea e le Atua o e matitiva i lenei lalolagi, ia tamaoiga i latou i le faatuatua”

Ua sili le tamaoiga o le tagata mativa i le faatuatua, nai lo o le tagata mauoa. O le tamaoiga sili lea, nai lo o le tamaoiga faalelalolagi. Afai e faailoga tagata ona o le mativa, o le agasala lava lea i mea uma. Ua soli foi e le tagata le tulafono o le alofa. “Ia e alofa atu i le lua te tuaoi, e pei o oe lava ia te oe.”

O le faatuatua, e tamaoiga ai tatou i le alofa.

## **GALUEGA FAATINO:** Faaliliuina (Translation)

Faaliliu mai le parakalafa faaperetania i le gagana Samoa.

“Listen my beloved brethren. Has God not chose the poor of this world to be rich in faith and heirs of the Kingdom which He promise to those who Him? But you have dishonor the poor man.” My brethren, do not hold the faith of our Lord Jesus Christ, the Lord of glory with partiality.”

**PESE:** 2 (Pese ma Viiga)

## **A’OA’OGA:**

1. Ia sili ona tamaoiga i le faatuatua.
2. Aua le taufaatauvaaina le tagata mativa.
3. Alofa i le ua vaivai.

## **MANATU TAIALA O OKETOPA:**

### **I TOTONU O FAIGATA MA LUITAU O LO O I AI LE ATUA**

E ese le tele o mea ua tutupu mai i lenei vaitau. O le fesuiaga o letau, o mala faalenatura o lo o tatou molimau ai i televise. E le gata i faama'i eseese ua aafia ai le soifua o tagata. Ao totonu foi o faigamalo, ua tau le maua se toamalie. O le upu a le faisalamo – "E faasaga ae ou mata i le lagi, e oo mai ai lou fesoasoani, o lou fesoasoani e mai le Alii lea." I totonu o nei faigata ma luitau uma o lo o i ai le Alii. E le tuulafoai i tatou e lona alofa tunoa.

**ASO SA: 23 OKETOPA 2022**

**MATAUPU: O LE ALOFA FAATINĀ**  
*(Motherly Love)*

**SINI:** Ia a'oa'oina pea le fanau i le taua o le alofa o le tinā. Ia malamalama o le alofa o le tinā ua faatusalia lea i le alofa o le Atua i le tagata.

**TUSI FAITAU:** Mareko 7: 24 – 30

## **FESOASOANI MO FAIAOGA:**

O le upu 'tinā' o lona uiga o le ola. E faapena foi le Atua, o le Atua o le 'Ola.' O le manuia lea na ave le Alii i le fafine ina ua pau mai le agasala. E le o se malaia. O le tinā o le tupuaga lea o le ola fou. Le sootaga lea o le tinā i le ola fou, e faavae mai ai le alofa faaletinā. O le tala masani lea i le fafine Fonie sa saili se fesoasoani le Alii, ona o lana tama teine ua ulufia e le temoni. Ua oo atu le Alii i le aai o Turo ma Saitonu, o nuu ese. E ui e lei taunuu le Talalelei i aai nei, ae ua aave tala i vavega ma a'oa'oga a Iesu i nuu ese.

O le mafuaaga lea na saili mai ai e le tinā lenei le Alii. Ua saili mai ma le loto talitonu atoatoa, e ui e lei vaai ma mafuta i le Alii. Ua maua e le tinā le Alii, ona faapau ai lea o ia i aao o le Alii, le faailoga o le loto maualalo ona o le alofa. Ua lē popole i le vaaiga a tagata, ua lē popole foi po o a mea e tupu ia te ia, ona o le tagata o nuu ese ia. Le alofa faatinā lea e lavatia i faigata o le ola.

A fua foi i upu na fetalai ai le Alii, e le faigofie ona taliaina e se tagata. O upu e mafai ona faapea, o lo o atagia ai le faailoga tagata o Iesu. Ae e le o le uiga lea o le manatu o le Alii. O fetalaiiga tuu sao a le Alii, e tofotofoina ai le faatuatua o le tinā. Aua nei naunau e saili le Alii ona o le manao, ae a maua ona toe galo lea o le Alii. E tai foliga faapena lo tatou olaga faaletagata, a maua le mea e manao ai, galo loa le alofa.

O le tali a le tinā, na silafia ai e le Alii, le moni o lona faatuatua. Ae a liliu foi i se isi itu, ua silafia foi e Iesu, le moni o le alofa o le tinā.

"Le Alii e, moni a oe, ae ui i lea o uli i lalo o le laoi e aai i latou i momoi mea a tama." Le Alii e," ua iloa ma malamalama le tinā, o Iesu o le faaola lea mo ia ma lana tama. Po o a lava upu a le Alii, o lea ua valaauina o ia e fai ma auauna o le Talalelei i nuu ese. E lei vaivai le faatuatua o le tinā nei. Sa finau ma le talitonu. Po o le a lava le mea e finagalo ai le Alii, e talia ma le loto faamaualalo.

"Ina alu ia ona o lau upu lena, ua tea le temoni sa i lau tama." E lei faatua oia le alofa o le Alii, o le alofa e laugatasia uma ai e ua saili ma le faamaoni i le Alii. E faapena le alofa o le tinā i lana fanau. E le faatua oia ona o ni faigata ma le vaaiga a tagata. E faatino ona o le alofa moni i le fanau.

**GALUEGA FAATINO:** Translation – Faaliliuina

"A Gentile shows her faith"

"The woman was a Greek, and she kept asking Him to cast the demon out of her daughter. But Jesus said to her, "Let the

children be filled first, for it is not good to take the childrens bread and throw it to the little dogs.” And she answered and said to Him, Yes Lord, yet even the little dogs under the table eat from the children’s crumbs.”

**PESE:** 91 (Pese maViiga)

**A’OA’OGA:**

1. Saili ma le loto faamaoni i le Atua.
2. E mausali le alofa ona o le faatuatua
3. E moni le alofa faaletinā.

.....

**ASO SA:** 30 OKETOPA 2022

**MATAUPU:** **O LE TUSI I LE EKALEZIA I SAMURANA** (*The letter to the church in Smyrna*)

**SINI:** Ia a’oa’oina ma malamalama le fanau i le mafuaaga na tusi ai le tusi a Ioane i le Ekalesia i Samurana. O se tusi faamalosiā.

**TUSI FAITAU:** Fa’aaliga 2: 8 – 11

**FESOASOANI MO FAIAOGA:**

*MANATU AUTU O LE MATAUPU:* ‘Aua e te fefe i mea e tiga ai.’ (Don’t be afraid by things that perscute you)

O Semurana e lona lua mai i le faagasologa o tusi i Ekalesia e fitu i Asia Itiiti. E muamua Efeso sosoo ai maSemurana. Ae

mai i Ekalesia ia e fitu, e lua lava e Ekalesia e le o i ai se faitioga a le Alii, o Semurana ma Filatelefia.

I le tusi i Semurana o lo o faapea upu o le tusi. “Ua ou iloa au galuega, ma lou puapuaga ma lou mativa, ua e tamaoaiga”

I Filatelefaia, o lo o faapea upu – “Ua ou iloa ua itiiti lou malosi, a ua e tausia au upu, ma ua e le faafitia lou igoa.”

E tele igoa sa faaigoaina ai Semurana ona o lona matagofie:-

O le matagofie o Asia (The ornament of Asia)

O le palealii o Asia (The crown of Asia)

O le fugalaaui o Asia (The flower o Asia)

Sa iloga foi ona tamaoaiga ma mamalu Samurana i lona tulaga i faafetauaiga, o faiga faapolokiki ae faapea i lona tulaga faalelotu.

I le tala faasolopito o Semurana a o lei fausiaina lona matagofie, sa avea ai ma nuu kolone (colony) o le malo o Eleni i le tausaga e 1000 TLM (Taimi Lumanai le Mesia) (BC). I le tausaga e 600 TLM na faaumatia ai Semurana e le malo o Peresia. E 400 tausaga na faatafunaina ai Semurana. Ae na toe fausia lona matagofie ina ua tulai mai le faiga malo a Lusimaka lea na sui tulaga ia Alesana le Sili. O le mea lea o lo o faapea ai upu a Ioane. O le na oti, ae ua ola mai.

O le sootaga foi lea o Semurana ma le Alii toetu. Ina ua tulai mai le malosi o le malo o Roma, i le tausaga 20 TTM (Taimi Tuanai le Mesia) (A.D). Sa saili ai se nofoaga e fausia ai le malumalu o le atua tamaitai o Roma. Na manumalo ai Semurana ma fausia ai le malumalu o Roma (Temple of the goddess Roma)

O mea ia sa lauiloa ai Semurana mai lava i le vaitaimi o Eleni, e oo i le taimi o Roma. Ae a oo mai loa i tala faasolopito o le lotu i Semurana. E tolu faafitauli ua i ai i le lotu.

- 1) Puapuga (Affliction) O le mamafa o puapuaga ona o mea ua tutupu (pressure of events)
- 2) O le mativa (Poverty). E 2 mafuaaga e mativa ai le tagata Kerisiano  
(i) E maualalo o latou tulaga

(ii) O lo latou talitonuga faa-Kerisiano.

- 3) Faafalepuipuiina – (Imprionment). E 10 aso e faafalepuipui ai le tagata Kerisiano, ae o lona iuga lava o le oti.

Ae mafua ona puapuagatia ma mativa tagata Kerisiano i Semurana, ona o le tele o tuuaiga sese ua tuuaia ai. Fai mai e ai tagata le au Kerisiano. E faatino tu ma aga faapaupau i tausamiga a tagata Kerisiano. Fai mai e le talitonu tagata Kerisiano i le Atua, ona e leai ni tupua e tapuai ai. E le fa'aaloalo tagata Kerisiano ia Kaisara, e mumusu e tau Kaisara o le Alii. Ua valoia le au Kerisiano le iuga o Roma i le afi.

E ui ina puapuaga ma mativa le au Kerisiano i Semurana (lotu) ona o tuuaiga sese i mea o le ola nei. Ae ua tamaoaiga le lotu i Semurana i le faamaoni ma le faatuatua i le Alii. “Ua ou iloa lou puapuaga ma lou mativa, a ua e tamaoaiga.”

Le ua tusi atu le Aposetolo o Ioane i le Ekalesia i Semurana. Ia e faamaoni ma tumau i le Alii, ona ou avatu ai lea o le pale o le ola.”

### **GALUEGA FAATINO:**

Fesili ma Tali:

1. O le a le tausaga na pulea ai e Eleni Semurana?  
Tali: 1000 TLM
2. E fia tausaga sa faatafunaina ai Semurana?  
Tali: 40 tausaga
3. O le a le tausaga na tulai mai ai le malosi o Roma ma pulea Semurana?  
Tali: 26 TTM
4. O le a le malumalu lea na fausia e Roma i Semurana?  
Tali: Malumalu o le atua tamaitai o Roma.

5. O a mea e tolu ia ua puapuagatia ai le au Kerisiano i Semurana?

Tali: Puapuaga ona o mea ua tutupu mai  
Puapuaga ona o le mativa  
Faafalepuipui taunuuga o le oti.

6. Aisea ua tuuaia sese ai e ai tagata le au Kerisiano?

Tali: Ona o le upu o le faamanatuga.  
“O lou tino ma lou tot lenei.”

7. O ai Kaisara?

Tali: O le tupu o Roma

8. O ai ‘Alesana le sili’?

Tali: O le tupu o Eleni.

9. O ai na sui tulaga ia ‘Alesana le sili’?

Tali: O Lusimaka

10. O ai le malo na faatoilaloina Roma?

Tali: O Peretania.

**PESE:** Tumau i le Alii

### **A’OA’OGA:**

1. O le tamaoaiga i le faamaoni ma le tumau i le Alii, e avea ai ma - “Matagofie o le Alii”  
“Palealii o le Alii”  
“Fugalaau o le Alii”

.....

## **MANATU TAIALA O NOVEMA: TALITONU I LE ATUA (Trust in God)**

Ua soo Samoa i le Talalelei ia Iesu Keriso, ma ua tau Kerisianoina ai tatou i lo tatou faatuatuaga. Ae o le avea foi ma Kerisiano, ua tele ai ona filifiliga ua tatou feagai i lenei vaitau. E fai o tulaga faale-aiga, faale-nuu, faale-malo ae faapea foi le Ekalesia. A oo ina saputu faatasi mai le faatinoga o le ola tautua i nei vaega uma, ona fememeai ma le mautonu lea, ua filifili po o fea e faamuamua. O le upu a le tusi, ‘Saili muamua le malo o le Atua.’ E saili faapeafea? E saili ma le loto talitonu atoatoa i le Atua. Ona foai mai ai lea e le Alii lona tamaoiga i la le tino ma la le Agaga, e faatino ai lo tatou ola tautua mo Ia, i totonu o aiga, nuu, malo ma le Ekalesia.

**ASO SA:** 6 NOVEMA 2022

**MATAUPU:** O TEPORA LE FAAMASINO  
(*Deborah the Judge*)

**SINI:** Ia a’oa’oina ma malamalama tamaiti i galuega lelei na faia e Tepora ina ua avea o ia ma faamasino mo Isaraelu.

**TUSI FAITAU:** Faamasino 4: 4 – 10

### **FESOASOANI MO FAIAOGA:**

O Tepora o le uluai faamasino tamaitai lea mo le malo Isaraelu, ina ua maliu Euta lea sa avea ma faamasino e muamua ia Tepora. O le amio leaga o le nuu, na mafua ai ona fa’aaoga e le Atua Iapino le tupu o Kanana e aoai ai Isaraelu ma nofo pologa ai i Kanana. E 20 tausaga na sauaina ai Isaraelu e Iapino le tupu o Kanana ma Sesera le taitai au.

Ua avea Tepora ma faamasino o le avā ia a Lapitota. Ua aami e Tepora ia Parako le atalii o Apinoama le Nafatali. Ua faamanatu

e Tepora ia Parako le mea na poloai mai ai le Atua ia te ia (Parako). E fai Parako ma tai au, o le fanauga a Nafatali ma Sepulona, e o e faatoilalo Sesera le taitai au ma le fanauga a Kanana. Ae ua le mafai ona usitai Parako i le fetalaiga a le Atua. Ua tulai Tepora ona o ai lea ma Parako e taitai le nuu o Isaraelu, Nafatali ma Sepulona, e tau le taua ma Kanana. Ua faatoilalo e Tepora ma le nuu o Isaraelu le nuu o Kanana. Ona vivii ai lea o Tepora i le Alii ma le nuu o Isaraelu i le Atua. O Ia sa fai ma taitai au mo lona nuu. E 40 tausaga o nofo filemu le nuu o le Atua, ao avea ai Tepora ma faamasino.

### **GALUEGA FAATINO:**

Fesili ma Tali:

1. E fia tausaga sa avea ai Tepora ma faamasino o le nuu o Isaraelu?  
Tali: E 40 tausaga.
2. O ai le toalua o Tepora?  
Tali: O Lapitota.
3. O ai le tupu o Kanana?  
Tali: O Iapino
4. O ai Sesera?  
Tali: O le taitai au a Kanana
5. O le a le poloaiga a le Atua ia Parako?  
Tali: E o ma le fanauga a Nafatali ma Sepulona e faatoilalo Kanana.
6. O ai le tama o Parako?  
Tali: O Apinoama

7. Na usitai Parako i le Atua?

Tali: Leai

8. O le a le isi galuega a Tepora?

Tali: O le perofeta.

9. O ai le faamasino na sosoo ma ii ai Tepora?

Tali: O Iuta.

10. E fia tausaga na nofo filemu ai Isaraelu, ao avea Tepora ma faamasino?

Tali: 40 tausaga.

**PESE:** 107 (Pese ma Viiga)

#### **A’OA’OGA:**

1. E viia le Atua i galuega lelei.

2. Faamasino faatasi ma le Atua.

.....

**ASO SA:** 13 NOVEMA 2022

**MATAUPU:** VALOAGA O LE PAU O  
PAPELONIA

*(Prediction of Babylons Fall)*

**SINI:** Ia a’oa’oina ma malamalama le fanau i le leaga o se atunuu ma se malo e faamaualuga i le Atua. O le mafuaaga lea na faaumatia ai e le Atua le malo o Papelonia.

**TUSI FAITAU:** Ieremia 51: 1 – 10

#### **FESOASOANI MO FAIAOGA:**

E 40 tausaga na avea ai Ieremia ma Perofeta mo le malo o Iuta i Ierusalem. Na amata mai taimi o nofoaiga tupu mulimuli e lima o Iuta, se ia oo i le taimi na faatafunaina ai Ierusalem e le malo o Papelonia. O le agasala tele o le nuu na fa’aaogaina ai e le Atua le malosi o Papelonia e aoai ai lona nuu. Ae ua avea lea tulaga ma mea ua tele ai le faamaualuga o Papelonia i le lalolagi. Ua oo lava i le Atua, ua na o se tala faafagogo i tagata Papelonia.

I le 13 tausaga o le nofoaiga a Iosia, na amata ai le galuega a Ieremia. O se taimi na toe fuataina ai le malo o Iuta e Iosia. Ae ina ua maliu Iosia, na toe foi lava Isaraelu i le agasala ma le ifo i tupua. Ua fa’aaoga e le Atua le malosi o Papelonia e aoai ai lona nuu.

O le faatafea ai o le nuu i Papelonia ua avea ma faapogai ua faatupulaia ai le agasala o Papelonia i luma o le Atua. Ua soona sau ma ua leai ai se saolotoga o tagata. O tu ma aga faapaupau o Papelonia ua faamalosi le ola ai o tagata uma ma ua iloga ona taotaomia ai le ola tapuai o tagata Isaraelu i le Atua. Ua manatu foi Papelonia e leai lava se isi malosi e faatusalia i le malosi ma le matautia o ona atua o Pele ma Merota. O le manao tele i le malosi ma pule e pulea ai le lalolagi, ua na o ona atua o Pele ma Merota e maua ai. Ae ua galo ai, o le malosi ua latou maua e mai le Atua lea.

O le faamaualuga ma le fia sili lea o Papelonia, ua oo lava i le Atua, lea ua valoia ai lona iuga e Ieremia. “Faauta, ou te faaosina le matgi e faaumatia ai Papelonia.”

O le valoia ai o le pau o Papelonia, o le faaumatia ai foi lea o ona atua o Pele ma Merota, lea e faamaualuga ai. Na taunuu lava nei valoaga ina ua tulai mai le malosi o Peresia ma faatoilalo Papelonia, ma toe faafoi le tafeaga e toe fausia Ierusalem.

## **GALUEGA FAATINO:**

Fesili ma Tali

1. E fia tausaga na avea ai Ieremia ma perofeta i Iuta?

Tali: E 40 tausaga.

2. O ai le tupu na toe fuataina le nuu o le Atua?

Tali: O Iosia.

3. O le a le manatu o Papelonia i le Atua o Isaraelu?

Tali: Ua na o se tala faa-fagogo.

4. Na taunuu valoaga o le pau o Papelonia?

Tali: Ioe

5. O ai le malo na faatoilaloina Papelonia?

Tali: O Peresia.

Uiga o Igoa

Igoa

Uiga (tali)

- |              |   |                                 |
|--------------|---|---------------------------------|
| 1. Ieremia   | - | O le Atua lo'u faaolataga       |
| 2. Papelonia | - | O le tina o tu ma aga faapaupau |
| 3. Merota    | - | O le atalii o le afā            |

**PESE:** 259 Pese ma Viiga (fuaiupu 1 & 5)

## **A'OA'OGA:**

1. Aua le manatu faamaualuga i le malosi ma le potu faaletagata.
2. E le faamaualuga le Alii, ae maualuga ma silisiliese lona malosi.

**ASO SA:**

**20 NOVEMA 2022**

**MATAUPU:**

**FAAMANUIAGA FAALEAGAGA**  
(*Spiritual Blessing*)

**SINI:**

Ia a'oa'oina ma malamalama le fanau i le tele o faamanuiaga faaleagaga a le Atua e ala ia Iesu Keriso. O faamanuiaga e le mafai ona tatou iloa pe afai tatou te le talia le Alii.

**TUSI FAITAU:**

Efeso 1: 1 – 10

## **FESOASOANI MO FAIAOGA:**

E tolu lava manatu autu o le tusi leni a Efeso

- i) Tamaoaiga o le Talalelei o le Alofa tunoa (Riches of the Gospel of Grace)
- ii) Fausiaina o le Ekalesia (Building up the church)
- iii) Taua faaleagaga ma le malosi o le Atua (Spiritual warfare and Gods power)

I upu amata lava o le tusi a le Aposetolo o Paulo i le fuaiupu e 3, o loo muamua ona faafetai i le Atua ona o ana faamanuiaga faaleagaga ua foa'iina mo le tagata e ala ia Iesu Keriso.

“Ia faafetaia le Atua, o le Tama o le tatou Alii o Iesu Keriso, o le ua faamanuia mai ia i tatou i mea uma lava e manuia ae i la le Agaga.”

E 12 taimi o lo o taua ai le upu alofa tunoa le tusi leni o Efeso. O le tautinoga i le valaauina a le Atua ma lona faamoemoe mo e ua talitonu ia Iesu Keriso. O le alofa tunoa, o lo o faailoa ai le tamaoaiga o faamanuiaga e ala ia Iesu Keriso. O faamanuiaga i

Ia le Agaga, ina ia faamalositia ai le talitonu ma le tumau o le tagata Kerisiano i le Alii.

O le tusi foi leni o lo o fautua ae Paulo i taitai o le Ekalesia i Efeso, ina ia mataala aua nei fevaevea'i o latou loto. Ia maua le agaga e tasi e fausi ai le Ekalesia. Ia fa'aaoga lelei faamanuiaga e tautua ma galue ai mo le finagalo Keriso. Ia tatou manatua foi, ua valaauina i latou e le Alii, e faia mea lelei mo le manuia o ona tagata.

Afai ua foi mai faamanuiaga faaleagaga e le Alii, ia faaauppegaina i latou i faamanuiaga ia e maua ai le malosi, e fetonai ai ma le tiapolo. E le mapu le fili ma ana au e taumafai e faaleaga le Talalelei ia Iesu Keriso. O faamanuiaga faalefaatuatua, e maua i le malosi sili o le Atua e tau ai le tau faaleagaga i le lelei ma le leaga, e manumalo ai i le tiapolo ma ana au.

O faamanuiaga faaleagaga, o le alofa agalelei loto faamagalo ma le faatuatua, ua uma ona faatino e Iesu Keriso, ina ua ia faamagalo le lalolagi agasala.

### **GALUEGA FAATINO:**

Faatonu le fanau e ao faatauloto le lauga fa'aamuia a le Alii (Mataio 5: 1 – 12)

Translation (Liliu mai le parakalafa faa-Peretania i le gagana Samoa)

“Blessed be the God and Father of our Lord Jesus Christ, who has blessed us with every spiritual blessing in the heavenly places in Christ, just as He chose us in Him before the foundation of the world, that we should be holy and without blame before Him in love.”

**PESE:** 73 (Pese ma Viiga)

### **A'OA'OGA:**

1. O le Alofa Tunoa o le Alii, o le faamanuiaga sili lea mo tagata uma.
2. Ia avea i tatou ma faamanuiaga faaleagaga e ola ai le ua vaivai.

.....

**ASO SA: 27 NOVEMA 2022**

**MATAUPU: O LE SESE O KALATIA MA LE A'OAIGA A PAULO**

**SINI:** Ia a'oa'oina ma malamalama tamaiti i le mea na lē fiafia ai Paulo i le Ekalesia i Kalatia. Ua latou vave ona faafiti i le Alii.

**TUSI FAITAU:** Kalatia 1: 3 - 17

### **FESOASOANI MO FAIAOGA:**

O tagata Kalatia e o mai mai i le itu i matu o le sami uliuli (Black Sea), ma nofoia i le itu i matu-totonu o Asia Itiiti, lea ua avea ma Farani i le taimi nei. O tagata Kalatia e tupuga mai i le tagata Farani. Sa avea Kalatia ma itu malo o le malo o Roma i na ona po.

Na faavae e Paulo le Ekalesia i Kalatia i le tausaga e 45 – 56 TTM (Taimi Tuanai le Mesia). A o le tausaga e 53 TTM, na tusia ai le tusi leni i le Ekalesia i Kalatia.

E lua ituaiga talaiga lea ua filogia ai mafaufau o tagata Kalatia:-

(1) O le Talalelei e uiga ia Iesu Keriso ma le faaolataga e ala i lona maliu ma lona toetu. Lea sa tala'iina e Paulo i lana malaga muamua i Kalatia.



(2) A o talaiga a tagata Iutaia, ua latou faamamafa ai tulafono. E faaolaina le tagata e ala i tulafono. Talaiga ia a le lotu Iutaia ua amata ona liliu ai tagata Kalilaia.

“Ua ou ofo, ina ua faapea ona vave liliueseina o outou i le na valaauina outou i le alofa tunoa o Keriso, ae faasaga i le Talalelei ese.”

O se tusi e faailoa ai le lē fiafia o le Aposetolo i le Ekalesia. E mafua ona o le vave ona faafiti e Kalatia o le Talalelei ia Iesu Keriso. O tagata Iutaia lea e taua i le tala, o Kerisiano Iutaia. Ae sili atu ona latou faatauaina tulafono. Ua manatu o le mea moni e atoatoa ona o tulafono.

E 3 lava mea moni e uiga i le maliu o Iesu.

- 1) O le ofo fua mai (Voluntarity)  
E lei maliu Keriso ona o se manao o le tagata. Ae na maliu le Alii, ona ua soli e le tagata tulafono.
- 2) E sui ai (Vicarious)  
O le maliu o Keriso i le satauro, na sui tulaga ai le malaia e oo i le tagata ona o le agasala. Aua nei avea le agasala e fai ma mea e ofo ai le agaga.
- 3) O le manumalo (Victorious)  
O le manumalo o Keriso mai le satauro ma le tuugamau, o le manumalo faatasi lea ma le tagata agasala.

E faapefea la ona fai mai e faaolaina i le tulafono, ae mautinoa lava o aso uma o le ola e soli ai tulafono. Le Talalelei ese lea, ua talai e tagata Iutaia, ua mafua ai ona tusi aoai atu Paulo i le Ekalesia i Kalatia.

Afai e tala'iina atu e se isi ia te outou se Talalelei e ese i lea ma outou talia ia anatema ia. O le tagata na te faafiti le Talalelei ia Iesu Keriso, e malaia lava o ia. O le mea ua manao ai tagata Iutaia, ia totogi tupe le faaolataga. Ae e lē o le finagalo lea o le Alii. E fua le faaolataga i le faatuatua ma le salamō.

Aua lava nei avea se mea e tasi o le ola nei, e fai ma mafuaaga e liliuese mai ai le tagata i le Alii.

### Uiga o Upu:

- |      |            |   |                |
|------|------------|---|----------------|
| i)   | Kalatia    | - | tagata ese     |
| ii)  | Paulo      | - | loto maulalo   |
| iii) | Keriso     | - | faauuina/Mesia |
| iv)  | fa'aaviavi | - | saili          |
| v)   | anatema    | - | malaia         |

### GALUEGA FAATINO:

Fesili ma Tali:

1. Aisea ua lē fiafia ai Paulo i le Ekalesia i Kalatia?  
Tali: Ua vave liliu ese mai le Talalelei ia Iesu Keriso.
2. O le a le mea o lo o faataua e Iutaia?  
Tali: O tulafono.
3. E faaolaina le tagata i tulafono?  
Tali: Leai
4. Aiseā?  
Tali: Ona e soli pea e le tagata tulafono
5. I le manatu o Paulo, E faapefea ona faaolaina le tagata?  
Tali: Talitonu ma faatuatua iā Iesu Keriso.

**PESE:** 73 (Pese maViiga)

### A'OA'OGA:

1. Ua nao Iesu Keriso e maua ai le faaolataga.
2. E leai se mea o le ola nei e faaluaina le alofa o Keriso.

3. Tumau i le faatuatua.

.....

**MANATU TAIALA O TESEMA:**

**O LE FAAVAE O LE OLIOLI (The Foundation of Joy)**

O le vaitau lenei o fiafiaga. O taimi e feofofoai ai meaalofa, o pati ma le tele o faamoemoega a aiga o le a faataunuuna. E mafua lava ona o le vaitau o le Kerisimasi. E faalogoina logo tagitagi o lotu, o tala e uiga i le Kerisimasi, o pesepesega ma leo malie e faatatau i le fanau mai o le pepe o le Kerisimasi. Ae manatua, o le fiafia sili lava o le olioli loloto lea ina ua suluia le lalolagi i le malamalama o le Atua, e ala i le fanau mai o Iesu Keriso, o le faavae lea o le olioli moni.

**ASO SA: 4 TESEMA 2020**

**MATAUPU: O LE MALAMALAMA O LE ATUA**  
*(The Light of God)*

**SINI:** Ia a’oa’oina ma malamalama le fanau, i le malamalama o le Atua, e suluia uma ai le pogisa o le lalolagi. O le malamalama lea o le Atua e ala ia Iesu Keriso, na suluia ai le pogisa o le agasala.

**TUSI FAITAU:** Kenese 1: 1 – 5

**FESOASOANI MO FAIAOGA:**

E le fesiligia le taua o le malamalama, aua e iloa i lo tatou ola ma le faagasologa o le natura o mea. E moomia le malamalama e iloa ai le ala e savali ai, e suluia ai le vaaiga moni i le tino mai o foliga vaaia o le foafoaga.

O le soona nunumi ma le pogisa o le lalolagi, sa fegaoioiai ai le Agaga o le Atua, ina ia malamalama mea uma. Ua fetalai le Atua - “Ia malamalama, ona malamalama ai lea.”

E lua lava vaega ua vaevaeina ai le malamalama:

- i) O le malamalama faalenatura (The natural phenomena of light)
- 2) O le malamalama faaleagaga (The spiritual phenomena of Light)

O le malamalama faalenatura e susulu, ae i ai le taimi e mou ma punitia ai. O moli feilafi, e faamalalama ai fale ua faailoa ai se mea taua ua tupu , e pei o moli o le Kerisimasi ma le tausaga fou.

O le afi, e malamalama ai le ala, ma iloa ai se nofoaga, a ua mate le afi ona pogisa lea. O le la e oso ae ma malamalama atoa ai le lalolagi, e iloa ai ua oo mai le aso ma ua faitaulia foi aso o le ola, ae a goto le la, ona le mafai lea ona toe galue, ua ao ona fai se malologa. O le masina susulu ma fetu feilafi o le faailoga o lo o leoleo mai le Alii, ao fai le malologa i le po, ae a gasolosolo ao, ma punitia ai le masina ma fetu, ona pogisa foi lea.

Malamalama faalenatura ia na faia e le Atua ina ua foafoa mea uma i le lalolagi. Ae le mafai e nei malamalama ona faamalalamaina le lotu o le tagata, pe a oo ina pogisa ona o faaososoga ma mea e tutupu i le ola.

O le malamalama faaleagaga, o le malamalama lea o le Atua e ala i lona Agaga Paia. A malamalama le agaga, e malamalama atoa le tino ma le mafaufau. E le toe oo ai se pogisa. Le malamalama lea o le Atua, ua tele ina faatusa ai le mau malamalama faalelalolagi, ae le tutusa lava. O le tagata ma lona lotu, ua pei o malamalama faalenatura o le ola, e i ai taimi e pouliuligia ai, ae a oo lava ina tupu le leaga i le lotu, ona pogisa faasolo atoa lea. A oo ina suluia le lotu pogisa o le tagata i le malamalama o le Atua, ona aveva ai lea o ia ma malamalama o le lalolagi. O le malamalama o le Atua e maua ai le toamalie ma le

filemu. O lea foi o le a tatou vaai moli feilafi o le Kerisimasi. Ae o le malamalama sili lava o le Kerisimasi, o Iesu Keriso, lea o le a faamanatu lona fanau mai. Afai tatou te talia ma le loto talitonu atoatoa le pepe o le Kerisimasi, ona faataunuu ai lea o le fetalaiga a le Alii. *“O outou, o le malamalama o le lalolagi outou.”*

**GALUEGA FAATINO:** Tusiga Tala

**“MALAMALAMA FAALENATURA”**

Tusi mai sau tala e faamatala ai le taua o malamalama faalenatura. E afa parakalafa.

**“MALAMALAMA O LE ATUA”**

Tusi mai se tala e faamatala ai le uiga moni o le malamalama o le Atua. E afa parakalafa.

**PESE:** 81 (Pese ma Viiga)

**A’OA’OGA:**

1. O tatou o le malamalama o le lalolagi.
2. E tumau le malamalama o le Atua.

.....

**ASO SA:** 11 TESEMA 2022

**MATAUPU:** UA LOGO MAI LE TALA I LE TUPU

**SINI:** Ia malamalama le vasega, i le tala ua logo mai e uiga i le Tupu ua Afio mai.

**TUSI FAITAU:** Isaia 9: 2 – 7

**FESOASOANI MO FAIAOGA:**

Ua tatou i ai i le vaitau e faamanatu ai e le au Kerisiano i le lalolagi, le Kerisimasi, o le aso na Afio mai ai le Tupu i le lalolagi, o Iesu lea, e ala i lona fanau mai. O le vaitau o tapenaga mo lea aso tāua i le lalolagi. E lē gata e tapena ai le itu i fafo i le siosiomaga faa-le-aiga, faa-le-nuu, faa-le-Ekalesia, ae faapena foi i le lotoifale o le tagata lava ia, i lona tino, mafaufau ma le Agaga. Ae o le fesili, pe aiseā e mafua ai ona tapena?

O le molimau lea a Isaia i le nuu o le Atua, ma le tulaga pagātia sa i ai, a’o sauni ai mo le Mesia o le a afio mai. *“O le nuu sa savavali i le pouliuli, ua latou iloa le malamalama tele. O e sa nonofo i le nuu o le ata o le oti, ua pupula mai ia te i latou le malamalama”*. O le Mesia o le a Afio mai e pei ona valoia e le Perofeta, o le malamalama lea mo le nuu. O le faaola mo le nuu, ma le lalolagi uma. O le tala lea ua logo mai, mo le Isaraelu ua leva ona nofo faatali i lo latou tupu. Manatua foi, o Isaraelu o le nuu sa fai ma fili o le tele o tupu ma nuu i lea vaitau. Sa lē mafaia i lena vaitau, ona e le gata i le malosi faafitafita sa i ai, a’o le tele foi o vavega na faia e le Atua na olopalaina ai ma faatafunaina ai tupu ma nuu na o latou taumafai e faatoilalo Isaraelu, ma saga faatumauina ai lava le malosi ma le ta’uta’ua o Isaraelu i lena vaitau.

Peita’i, ina ua faatoilaloina Isaraelu ma ola puleesea, ona o i latou lava i le faia o le agasala ma le ifo i tupua, ona lagona ai lea o le i’uleo i tagata o le nuu, i le nofo faatali lea i so latou tupu, auā le faasa’olotoina ma le ta’ita’iina o le nuu, faapei ona i ai muamua.

O lea la ua ta’u atu i le nuu le Tupu o le a afio mai. O le valoaga lava lea i le Mesia. Mo le Isaraelu lava ia, ua faafiafiaina ma ua i ai ma le lototele e faatali ai. *“Auā ua fanau mo i tatou le tama, ua foaiina mai mo i tatou le atalii, e i lona ua le malō, e igoa foi o ia, o le Silisili ese, o le Faipule, o le Atua malosi, o le Tamā o le faavavau, o le Alii o le filemu.....”*.

O foliga ia ma tulaga taualoa ia o le tupu e pei ona i ai le tala ua logo mai. E ao ai i le Isaraelu ma le Iutaia, ona tapenapena se

nofoaga e afio tumau ai le tupu ua folafola mai. O se mitamitaga tele i le loto, mafaufau ma le agaga o le Isaraelu moni, leaga ua leva ona faatalitali i ai. O le tala ua folafola mai, o se talalelei lea mo le Isaraelu faamaoni, o lo o moni lona nofo faatali i le Tupu ua valoia mai. O le tala i le faaolataga o le a faataunuaina, mo le tagata ua fia sa'oloto ma malōlō mai sauaga matagā ma faiga soona fai a nisi tagata, aemaise o le tagata o lo o taotaomia ona o le puleesea e le malosi o le isi tagata.

O le fesili, “O ai le Tupu ua afio mai, e pei ona i ai le tala ua logo mai?”. O le tali o Iesu. Le Tupu lea ua leva ona faatalitali ai le au faatuatua Kerisiano faamaoni. O le Mesia mo Isaraelu, o le Faaola mo le lalolagi uma, o le Faipule mo nuu uma, o le Atua malosi mo lanu ma gagana uma, o le Tamā o le faavavau mo tagata soifua uma, o le Alii o le Filemu mo talitonuga uma.

O lona uiga, o le tupu ua afio mai, e moomia ai le olaga fou o le tagata. E ao ai i le tagata ona tapena lona loto, tapena lona agaga, tapena lona tino ma lona mafaufau, ina ia faaulufale ma ia nofo tumau ai le Tupu ua fofola mai ma afio mai. Mo oe le tama ma le teine, o le tupulaga mo nei ma a taeao, o fea o e tapena mo le tala ua logo mai? E manatu le mataupu o lenei aso Sa, e tataua ona tapena lou talavou, e ala i lou tino, mafaufau ma le agaga. O i tāua o le lumana'i o aiga, o le nuu ma le Talalelei. E faamoemoe taeao, i le asō. O le uiga o le manatu, o le lumana'i, e fuafua i le taimi nei. A lelei le taimi nei, e manuia le lumana'i. Ae a faaletonu nei, e sili ona faaletonu le lumana'i. O le tupu ua logo mai, o le Pepe lava lea o le Kerisimasi ua o tatou i ai. Tatou sauni e talia ma le loto faafetai, auā o le Afio mai o le Tupu, le Pepe o le Kerisimasi, o le oo mai lava lea o le faaolataga i le lalolagi. O le tala ua logo mai, o Iesu le Tupu, o le Mesia, o le Faaola, o le Faipule, o le Atua malosi, o le Tamā o le faavavau, o le Alii o le Filemu.

Ia manuia tele le sauni atu mo le Kerisimasi ma le Tausaga Fou.

## **GALUEGA FAATINO: FA'AALIGA O MANATU**

Ua logo mai le tala i le tupu, lea ua faailoa e le Perofeta o Isaia o le a fanau mai le tama. O lenei tama, o le Alo lava o le Atua, ma sa faaigoa e Isaia lenei tama, o Ia:

- O le Silisiliese
- O le Faipule
- O le Atua malosi
- O le Tamā o le Faavavau
- O le Atua o le Filemu

*Tuu le avanoa i le vasega, e fa'aali (express) ai o latou manatu ma lagona, i le mafuaaga ua faaigoa ai e le Perofeta o Isaia le tupu o le a Afio mai, i igoa ua tāua i luga. E pule lava le tama ma le teine i le loloto o le faamatalaina o manatu ma lagona.*

**PESE:** (Pese Kerisimasi)

### **A'OA'OGA:**

1. Ua oo mai le faaolataga i le lalolagi.
2. O Iesu lava le tala ua logo mai, mo le au faatuatua uma i le lalolagi.
3. Ia tatou tapena o tatou tagata atoa mo le tupu ua afio mai.

.....

***Manuia le Kerisimasi ma le Tausaga Fou***